

中牟縣志

卷十一至十二

7-10.35
0004
5



中牟縣志卷之十一

藝文志下

序

潘太常集序

明張溥

太倉人翰林

史稱潘正叔著論究人道之綱裁爲懸乘輿之鑒此二文者非徒龍甲鳳毛亦其生平所以自立也元康薦亂八王鬪爭從父安仁一門罹酷正叔知幾歸掃墳墓後得封公顯職壽終鵬壁當安仁初任河陽贈詩祖道美其天姿刑戮之後樹碑記事增慟覆醢其於叔父情篤猶中郎也存沒異路榮辱天壤逃死須臾之間垂聲三王之際至今誦閒居者笑黃門之乾沒讀安身者重太常之居

正人物短長亦懸禍福泉下嘿嘿烏誰雌雄卽有不平能更收召
魂魄抗眉爭烈哉傅長虞會定九品正叔作詩規之其爲人也無
詭隨其爲文也無戲謔大致類然若琴有八分之書賦著琉璃之
盤適文人餘韻也

張林宗先生遺詩序

王思任

山陰人
參政

客有馮君散木從賊中辛苦逸出持一帙偕門人范中文謁我云
此中牟張林宗先生詩也予驚視之有是哉尚有古詩不亡之事
乎已而知爲杜史櫟園周先生所遺嗟乎林宗呼兄一字肝花肺
葉血裂髓崩矣安復計及兄詩顏淵近苦徐釋近矜至吾兄林宗
何等也以金自處以玉處人其愛人也如不是其敬人也寧有餘

稱之曰聖其殆庶幾曰佛曰仙不知伯仲坐所抗在何上下天數
隕國先及哲人黃流沒派以數萬萬生命之中亦復魚鼈我大生
廣生之君子且併其枕中之秘絕命之散收入龍宮吾不怨天而
怨數允雋一線乃存萬世之鼎遺稿數吟實傳三百之燈允雋勉
哉顧名思義賈先生詔汝汝父之志也然櫟園先生是今之程嬰
荀淑大梁尚有人在

題什衡周先生崇祀鄉賢序

黃 機

浙江人
尚書

間考周禮賓興三物王制命鄉論秀士升之司徒漢詔郡國舉孝
廉及賢良方正諸科先德行後文藝皆取鄉評爲辨論之本降自
唐宋後漸沿科目惟博學宏詞是尙駸駸非古論秀於鄉意矣猶

幸與古相近者有崇祀鄉賢之典在凡天下郡縣建祀於學宮之側所司歲時致祭鄉之士大夫有出處行誼卓然表見於世者例得請於守令守令上之督學使者爰是覈其生平參之輿論然後命有司祀之尙未失古先王風勵天下之至意焉而往往爲貴勢所憑藉凡門庭薰灼子孫欲導揚其祖父慮無不鋪張溢美以膺茲盛典揆之月旦或未必盡符彼篤行君子惇敘彝倫不求聞達者或缺焉未槩見可勝歎哉以余所聞孝廉任衡周先生庶幾與古論秀於鄉及崇祀鄉賢之典兩無愧焉先生家世開封之中牟縣登庚午科鄉薦性至孝以二八春秋高慮目昏不逮親存也遂絕意仕進自養生至送死弗之有悔焉其於同氣也破屋購金

以脫弟于難厚于族黨也勤恤其孤獨而經營其生死且延其後
矣其禦災捍患有功于鄉閭也出粟救荒所全活無算倡守望之
義以遏寇亂一方恃以無恐生平喜施予拯困厄爲人排難解紛
而不居其名者難更僕數迨公之卒邑中紳士父老僉謂公長者
宜祀諸鄉爰得請于當事禮成中州諸縉紳先生出公之崇祀錄
畀予一言記其事予惟君子經明行修學成而後擧于鄉及其卒
也人追思其行誼而世世祀之弗替生負榮名死存祀典咸以鄉
評爲重昔宋文信國爲童子時見學宮所祀鄉先生諸像欣然慕
之曰歿不俎豆其間非夫也其後魁天下死生一節於過廟興思
時已具追蹤古人之志然則國家礪世磨鈍與士子敦尙名教不

于祀典綦重哉先生始以賢書舉于鄉終以鄉人之請祀于學合之鄉人之清議則知公之事親孝友于弟仁于宗族而有功于閭黨非僅一鄉之士已也以移于事君則忠以施之民物則無不被其澤始于一家推之一國放乎四海示之天下後世而勸凡先生之未竟其志者無不可以鄉評準之古所謂論秀于鄉賢之意得先生而名實俱存矣其次公鈞叟班列鴻臚立朝贊采裒然能以清白世其家將丕承前烈而光大其緒者正未有艾余故樂從中州諸薦紳先生後頌颺公之行誼以風示來茲于是乎序

傳

明南京戶部尙書張公傳

李維楨

京山人
副使

張公名孟男字元嗣中牟晶澤人也少風神秀徹淹通有理識讀書郭外僧寮口徑廢河白晝行旅斷絕公恒以雞鳴巾夜獨往來若有物前導者卽雨淖不塗足同舍生跡之皆大驚知當似其遠祖矣蓋公之先十世有仕元爲禮部尙書者云舉進士除廣平李官廣平燕趙之交其俗大抵情急上氣勢報仇過直輕爲姦吏善舞文而公所摘發得情傅比申律一日可結竟大獄數十老胥吐舌抱案拱立然而簡易寬恕居恒自省無鍛鍊周內以立聲名所平反縱舍不可勝計廣平人去後見思旣用治行高等徵故事徵者詣侍御史及中丞臺辭皆有饗禮侍御史已與公爲期質明公謁中丞就邸申治具饗公比出而侍御史公失期是美謂旦暮給

事省中居我上不屑就也中之銓曹出公丞漢中事白擢順天治中已徙司寇尙書員外郎已徙宗伯省已徙尙璽丞治中威儀伍伯二人朱障泥裹牡荆馬首前喝司寇郎一人青障泥宗伯郎一人右執荆左攜胡牀而已尙璽丞與治中同而腰帶無花不得執象笏都人爲之語曰張公三宦騶減半宦無厚橐帶花落象齒不足繼以竹是時高文襄以輔臣攝冢宰事爲公進士舉主其夫人公姑也隆慶初徐文貞當國與文襄共事不相能旣召用頗修郤而險人爭寘力焉取其所舉進士爲六曹郎者布之兩都臺省百許人貨行于言罪成于手皂囊白簡如蝸如蟻矣鄉人河內武安之屬乘幸執權震而矜之道路以目公守散曹罕交人事歲時起

居夫人則文襄置酒便坐歡燕諧謔終不及他一日詰夫人卿家
尙璽何爲踈我夫人對曰天下事方在公掌握不以妾故昵妾猶
子猶子不敢以私請妾知免矣當爲公賀文襄笑曰卿言大佳少
司寇曹公者文襄姻家與公亢志清妙外絕營競譽輯朝野標的
當時謂之中州二室言其正體嶷然也會先帝晏駕梓宮在殯太
皇太后暨仁聖皇太后未封正酷暑俄傳上與二后三旨同下削
文襄籍徒步出門操之爲已蹙矣人心震駭門生故吏烏獸散公
驟馬之文襄邸入其門無人門焉者入其閨無人閨焉者文襄反
袂拭面涕沾袍怖哉諸大夫遂無化我也吾不早知子生無相見
死無相哭公從容慰藉曰四時之序成功者退士□□勇之甚何

爲言此幸而退足致樂耳質明攜簞食與艇脯祖文襄于郊文襄
下韋藩加櫬而執手臂以爲席鞍以爲几大嚼而別吾夜思子之
言嘉子之行若熱之有濯也江陵執政以刑名繩下有震主之威
薦紳歧意於楚或勸公數候問之公不可鄉者不昵吾戚而今親
所疎乎君子比德以贊事不引黨以封己吾充位九列無職競焉
卽私見執政何所置辭長安奕棋吾貫習矣俛眉承睫諸附貴勢
今安在哉殷鑒不遠君無復言而江陵亦悉公不黨然不褒異公
公爲丞四年遷卿卿一年遷卿卿三年遷南京太僕少卿三年考
績客言江陵遇公不薄何自外公曰執政以我不阿故相見知奈
何負知己言者語塞五年江陵切受禍視文襄烈矣公名愈重二

年四遷自太僕太常大理三卿爲少司空皆在南京三年復考績以少司空行通政使事又三年爲少司寇爲左司徒踰年爲南司空未上移南司徒公之爲通政也上久不視朝中外言事多報聞罷或留中公疏言祖宗朝日一再御門臣司日取事重大者請與諸大臣面計可否凡臣民封事急則應時緩不過三日又摘兩事日起數引奏者至御前承旨下之諸司陛下今八月不視朝矣四方災異頻仍星辰繆越坤靈震動年穀不登人相食啖白骨委積臣聞人之於天也以道受命人之於人也以言受命不若於道者天絕之不若於言者人絕之羣臣久不見至尊進無所關其忠退而尙書置不省覽人誰受命下閣上聳幽隔鬱滯天地否塞不亟

采納施行欲以抹撥災異必不得之數也日者越人翟繩祖輩稱
故都御史李材功蔡人喜彥科輩訟故令曹世卿冤臣循舊例繫
兵馬司橐籥不繼莫必其生虧損盛德臣職在喉舌責望所歸不
任欵欵之志上稍爲聽受而中貴人關說者謝絕之妄加詆謀居
一歲請張杜口覆沒信眉則頌聲作矣書都賦額半於京師有司
玩愒積逋鉅萬公請重總督糧儲之權以課殿最爲黜陟于是飛
輓纏屬歲入數倍可支七年而諸郎公權者如蟻附羶如猛獸驚
鳥之發爲量豐約均勞逸差先後遞出入金夫不便也噴有煩言
公力謝病歸散髮衡門若將終焉中外推轂舊臣以公爲首五歲
起家仍故官疏辭不允既至張相其息而掃更其弊主者白金不

滿五萬財足兵兩月餉夏賞不與公酌緩急定期會權賢遷通有無迨夏而稟賜一無所絀士不呼庚癸商不得射時收倍稱之息府庫倉廩有贏而島寇播夷作難宮殿數災少府水衡時取給無乏長子早世守藏吏以百金調棺殮問所從來曰羨也公愀然奈何以私喪費公裕夫仲尼之于伯魚非耶卻不受修倉席竹故取諸司空公覈得贖錢二千建府軍左倉三廩司空不知也久而司空嘆曰廉不爲名公之謂矣六年考績加太子少保益感奮孳孳公家之務旣病議分水兌支倉儲及豁除虧折諸大利害伏枕具草以是勞瘁日甚凡五乞骸骨上優詔慰留而最後病力慕史魚尸諫爲遺疏云云屬其子上之疏行明日公卒士大夫讀其言而

悲之少司徒趙公率諸僚奏公清忠大節羽儀表著宜有殊錫以旌鴻碩上下禮官議其宜贈太子太保遣內史治喪祭有加等公亂而失母未仕而失父深用銜卹入朝展墓諸哀端所觸涕數行下事仲父季父如事父母所居圖史凝塵飲食衣服器用猶惡與寒峻伍終鮮兄弟同氣之親綴之以食而非殊婚姻鄉黨施各有差中常有以下人年位彌高不謐平昔時意中牟有加賦數十年物力因以彫剝白當事者蠲除之邑人歡若更生比戶祝焉口不言人短所獎拔才俊士甚衆士無知者或知而稱謝自詭曰無有嘗讀書至克勤于國克勤于家極賞其言服之終身中子孝廉民表有文學虛靜恬淡宅心事外人倫之勝業也

檢討冉蟬菴先生傳

張伯行 檢討人
大分

君姓冉諱覲祖字永光號蟬菴先賢鄆國公裔世爲山東曹縣人元末有爲中牟丞者因家焉君之高祖鼎成化丙午舉人知長清文麟遊三縣封陝西道監察御史曾祖崇儒嘉靖乙酉舉人知豐潤保定平山三縣仕至鹽運司祖夢元例監生父佐歲貢生

勅贈徵仕郎翰林院檢討君生而靜重寡言坐立凝然有成人之度時方勝國之末贈公從兵燹中授以章句卽能沈潛服習人

國朝文名蔚起屢爲前輩所稱年十七補博士弟子員甲午赴鄉試時塲屋在輝之百泉書賈會集君見牙籤森列目擊心賞遂傾囊購五經四書大全并諸大家文集不復爲應試計歸而發所購

書丹黃甲乙殆忘寢食有志作者之林矣有以二十一史來售者
價重不能償謀於諸兄共購之沈酣鉤纂考辨益精博汶上袁生
深於等韻之學適遊中牟君與之講論五日盡得其傳其性敏而
力專如此雅意網羅千載不屑屑於科舉之業同學多速飛或以
病君康熙二年舉鄉試第一衆始大服顧君浮沈公車幾三十年
無幾微不平學問行誼日益完粹著四書詳說遞及五經各有專
書兼採漢儒宋儒之說不苟同亦不苟異期於折衷至當每一經
必閱數年而始脫稿時論盛稱來易蕭山來知德音姚江餘派故
爲易說改立錯綜名色欲與程朱抗行君著論駁止之釋詩者類
宗小序尊毛鄭而疑朱子君校其異同參觀並列使讀者瞭然知

所去取以小戴記禮原白叢雜而鄭學不純貽誤甚多未經朱子
訓釋終爲疑案於是摘鄭之失補陳之畧歷五年而書始成歲已
未開鴻詞博學之科郡縣交推君開府遲君一見卽入告君逡巡
久之事遂寢性蓋以往見爲非禮也京師有爲名士會者爭欲得
君爲重君力謝之司空湯潛菴先生曰冉君不入名士會此眞名
士矣嵩陽書院宋時四大書院之一今其址僅存諭德耿公逸菴
與今少宗伯景公冬暘共鼎新之延君主講席禮辭至再書幣益
恭遂赴之縣令郊迎主人授館翼日入書院與諸生講孟子一章
剖析天人分別理欲衆皆悚聽隨出天理主敬圖爲學大指二冊
頒示學者耿公梓而行之四方聞風踵至遇開講之期弟子環侍

耿公亦側坐斂容以聽講畢設酒饌於疊石溪川上亭酒數行起游巖礪薄暮而歸在嵩所爲文曰文測詩曰嵩吟學者爭爲藏弄君平日於陽明愛其文章勲業持論頗恕至是乃謂教人無歧路此是則彼非不可不嚴辨於是陸王之學不復假借矣辛未成進士五策精核尤爲安溪李公所賞選翰林院庶吉士益邃於性理之學甲戌授翰林院檢討是歲

上徧試翰林每日四人分班考藝

上御四媛閣詢家世籍貫獨詳賦詩畢復問科第名次及敦學之事既退掌院學士傳

上語有氣度老成之褒於是感激知遇省察益嚴越旬日

賜宴瀛臺坊院諸臣畢至

上獨識之曰爾是河南解元也蓋以示優異也丁丑分校禮闈得十一人皆闈修之士龔汝寬名在第二其文則會元也秋

上北征凱旋

御太和殿需恩授君徵仕郎父母皆被勅贈君捧之而泣曰

聖天子榮及臣親於願畢矣遂請假歸行燎黃禮周視墓舍卽爲嵩陽之行時耿公已下世學者寥寥君徘徊不忍去擇其才俊而成就之是時余官京師與君交最深我儀方築請見書院延君主教事而登封合力請還嵩君不得已東西兩赴尤以太極西銘指示聖學脈路一時士子皆超然自得於帖括之外而我儀之嚮道

者日益衆學問踐履益彬彬矣五經之外復纂孝經詳說又著陽明疑案較之整菴後渠論辨尤爲嚴正然恐學者徒騰口說忘却向裏功夫扁之篋笥未嘗示人也假滿補原官爲正蒙補訓四卷越二年告歸蓋君之仕也爲晚成而遂初之賦則加速焉士大夫尤高之歸而育士益勤好學益力時內廷方纂修五經大學士安溪公以五經詳說上聞乙未春都御史劉公爲纂修總裁奏請內府藏書以供採取

上諭河南冉某有五經詳說可取來參用於是使者取書去君復繕其副藏於家焉君年八十餘名益高中州大僚皆仰重之欲建書院廣士田以君爲矜式君以疾辭疾屢愈屢發遂捐館舍戊戌

十一月某日也君天性孝友痛父母之早亡也祭祀必誠必敬追慕深切贈公有潛德學使者尤多士之請崇祀鄉賢君心始一慰君行第五其第四兄主家事先世之產未嘗析迨兄沒而其子落以析產請君笑曰我兄弟不忍分今乃叔姪分財耶卒不問也君娶梁氏邠縣教諭梁公天民女有淑德事姑極孝君友教在外婦姑相依篝燈紡績每至夜分遇姑病撫摩扶持進湯藥不離左右循至不起哀痛幾不欲生相夫子營喪葬皆如禮婚嫁四男二女豐儉適宜皆可法丁丑封孺人辛巳年六十四以沒持家數十年規畫井井俾君一意稽古絕無內顧之憂者孺人力也子四人說衍以固始訓導中甲午科舉人謠衢國子生註選縣丞調衡丁酉

科舉人詮衢國子生註選州同知皆以學業繩檢自勵有名于時
君生平無他嗜好深思遠紹探源理窟旁及詞章典故皆有纂輯
寢饋萬卷中自號蟬菴洵不誣也被服雅素蔬水自甘苞苴竿牘
不至門卽至門必委婉其詞以却之閣學巢寄齋嘗以使事迂道
訪君論學析疑流連信宿念君貧甚出兼金爲贈固辭不受寄齋
賢者又居林下謹嚴尙如此則操守可知矣贊曰余觀二程子及
朱子在宋時道勝名高皆不免異己者之忌今檢討遭遇
右文之世侍從禁林

顧問優渥下則僚友心孚生徒誠服年踰大耋著書滿家雖不獲
躋公輔以究厥施身世之交固已泰然矣至于舉案者如賢傳經

者趾美當世士大夫亦往往稱道不絕也

按舊志載有六傳原不應刪然魯任二公及潘安仁叔姪均係照錄諸史原文並非另有增減以歷代史帙昭燦古今何煩一隅之書再表揭耶惟張冉二先達之傳非出史臣原編而作者亮節清風亦互相輝映謹存之而益以新傳之二

張封公家傳

陳

彝

江蘇人編修

公諱箕翔字克第先世爲閩之永定縣人九歲隨考秉勤公遊中牟遂家焉少穎異治諸經將畢以貧故不應試家世故善醫學其業旣成所投輒愈遇貧者則不受其謝生子二其仲鴻業生李教鴻遠領辛亥鄉薦第一又十一年親見其成進士入詞館

年七十 封文林郎 晉贈中憲大夫粵賊之擾中牟也公偵知其魁爲廣之大埔人與永定語相通也乃操土音迎與之語論以大義反復懇至賊爲泣曰吾亦不獲已也麾衆去所全甚衆賊既去公家乃爲不逞者所略或請鳴之官公曰風俗敝而後盜賊生吾輩當自責奈何與若等較且鳴之官將以懲莠民也而或累良民置良民於法心固不忍與莠民爲仇勢尤不可竟不問旣而鄉團事起或欲因是減徭役之重累者曰此陋規也令曰此舊規也相持數月不決公往來兩間調劑百端卒使上下不相病其後連莊會抗官之案所在多有中牟獨無公之力也公以勤苦起家有餘財輒以濟人凡邑之水旱疾疫天札以至城郭祠廟渠之工

作莫不賴公以濟故公之子登科第鄉人莫不推賞焉爲有子道也沒之日隱民莫不垂涕也 年家子陳彝曰庚午歲在京師子駿同年數相晤出公行狀命爲傳公之居鄉也敦厚重愷人閒言執親之喪日再奠必視饌如生時必號泣期年猶然蓋庸行之君子也而能撓賊鋒以保其里閭豈不異哉誠至則明生仁至則勇生唯其心純乎爲人而無毫髮之私於其閒然後能行權發濟變惜乎不大見用於世也

太學生邢公傳

張鴻遠

邑人
編修

邢公諱大學字鶴羣世居中牟城北二里許幼通經顧貧以醫繼先業而奉親罔輟甘旨旣冠小阜以公儉且勤故家有宅一區至

是徙居縣城畢推以贍族有貧莫嗣者復謀家宰成之初先父入籍中牟三十餘年矣及予試衆仍錮以它籍公力爭之迺雪先君因益重公以予弟鴻業贅于公公亦遣子同予昆弟讀癸卯三堡河決苗民遷徙流離餓莩相屬于道公賭之慨然與先君謀出資掩骼葬骨作饘粥以餉餓者全濟無算鄉里至今樂道之公以太學生終子爲翰冠縣軍入庠食餼以辛酉科拔貢官州判 贊曰公居鄉里若錄錄無奇節然性伉直較無所欺及接言論又藹然儒者氣莫測其學之淵委烏亭殆篤行之士邪

銘

縣令周公遺愛碑銘

明周敘

吉水人編修

天子分遣廷臣遍祀天下名山大川暨古先帝王之有功德于民者敘實遣祀宋諸陵由河南會府道經中牟令丞而下俱迎候余因問曰國初有縣令周姓者若等有識之者乎其在邑爲政何如衆曰是所謂吉水周築者其遺愛在人至今雖童孺亦聞知其賢俄而有父老楊約禮輩十數人厲眉皓髮謁予公館前進曰往來朝使多矣乃今道及何也予應之曰公實予族祖幼時側聞其爲政之善而未得其詳故詢之爾父老曰今尚在否予曰終已十有五年矣遂皆相對嗚咽泣下者久之因嚮予歷歷道其設施撫字之循且曰吾邑前後爲令不啻數千百人自魯太師恭後卓卓著稱者逮公方四五人爾累欲刻石頌公之遺愛又懼數世之遠故

老凋零後之人無復有詳其事而卒未有記之者敢以是請予再
三辭不獲知縣張玟教諭李繹等又以爲言乃復之曰昔魯恭之
治中牟有三異之政青史書之邑里祠之芳聲偉烈邈乎不可尙
矣今公生于千載之下繼治茲邑乃克蹈芳躅俾民思慕愈久而
不忘者此豈非賢與觀公之爲政也承海內初定之際下車首莖
奸弊立條教有王雒陽之風立學興賢修舉廢墜有蜀文翁之治
弛火禁以便民則放乎廉叔度之雅量去任却贖縑之受則厲
劉山陰之清操威以臨之寬以惠之使民敬之如神明戴之如父
母歷五十餘年而邑之人猶追思而不置也嗚呼盛哉公仲方
脫號隨菴世爲吉之吉水人由洪武庚戌進士授侍儀使轉中牟

令居七載以政績優異擢奉議大夫同知臺州府事太祖皇帝嘗頒示彰善錄於天下特表著之歷長樂令吉郡司訓永樂初朝廷遴選老成治水利於蘇湖公蒞事閱九年以疾卒於官享年六十有九其所至政教不異中牟其子弟先後列官顯要者尤衆公家世以文學科第爲鄉郡望族從子公明歷長洲教諭從孫迪曾孫源咸舉進士族子岐鳳今爲兵部職方員外郎則敘之父也頌公之遺愛而并及其世者所以俾中牟之人知公之政不徒善於其邑而其學尤有以淑諸家也若夫探公之行事達於朝以入國史以附祀於魯公之側則有觀風者在焉安知其不有徵於斯乎并系之以銘曰烈烈魯公惠我中牟卓哉三異邈焉寡儔公起

承之後百千秋飭躬礪行用光前休不威而畏不剛以柔煦我公
子力稽服疇迪我髦士德進業修弛我火禁我妄其由我不可儻
公不可昧年穀屢登野無騰螽起我呻吟化爲歌謳皇懋公績陟
佐大州彼民之慰我民之憂公今逝矣遺愛尚留敢忘公訓以展
厥尤刻石載德爰備詢諏百世之下前魯後周我民之思我思悠
悠 宣德元年

宣安王公德政碑銘

陸東 金華人
知縣

萬歷甲戌春朝詔舉旌異之典冢宰以卓異諸臣聞上心嘉悅賜
宴禮部躋辭復面諭賜金幣寶鈔蓋曠典逾百年隆萬兩朝始一
再舉內外臣工胥用救勸時中牟大夫王公實拜茲寵數邑人喜

其令被知遇又虞其召之亟治澤莫可久露也迺伐貞石圖記德政示方來惟時學博士周君大謨輩率諸士謁余文余問德政何如周君曰廉平惠愛大夫之心也教養興罷鋤慝又良大夫之政也余曰可悉指乎周君曰唯唯請繆陳之初大夫之蒞政也憫學宮之敝育才之無所迺捐俸以新黌舍日省月校士彬彬興焉延於里社咸創小學擇端師以教童子設保甲敦鄉約講武事是其教也詳軫民之瘠則督之懇蕪田植桑棗招徠流散之民爲之蠲逋負復丁役還遺產不期年而歸業者幾伍百戶口且千餘其孤獨存恤以時疾疫則鉅之藥雖繫囚咸周是其養也備邑患賈魯河下流沒民田常數萬畝大夫爲濬坊之民迺田食戒民無淫祠

之邀福俾勸貲以建橋梁者九民迺免於病涉里民眾寡或相懸者爲之哀益適於平易排甲之奸避核豪業之詭冒嚴簿正復輕輸還驛金之外移者賦役迺均是其興利也博里甲縮其浮費書手汰其宿黠詰戎正其名籍緝理嚴其漏妄驛遞稽其出納征商書其定額往者民所疾苦大者暴客鹽禁遠戍舞文小者使役誅求巡澗漁索時適咸息民用字字是其去害也鉅凡此皆大者可指它不可以言既總之繇大夫之心廉平惠愛以出之也陸生曰嗟乎卓魯款款情慈德滿斯言豈虛語哉中牟古稱三國之股肱邢鄆之肩髀未爲國城西門衣冠往來之孔道今省右首邑繁衝如故邢鄆畿南要區斯地猶其輔也今自邢子之後惟漢魯仲康

其最也繼美者則宋石昌言史稱仲康平理許伯等爭田皆進而
自責輟耕相讓勅亭長借牛不還者卒慚還之及蝗不入境禁止
其旁豎子不捕纔四數事昌言罷富人隸太常僥倖免役者六十
餘家止一事爾視王大夫令績孰多少哉昌言雖名治狀顧持身
鮮介非大夫之擬惟仲康童年孝友學士所歸貴豪遣問餽遺堅
辭故能以德化爲理上下孚服實有似於大夫蓋魯氏世吏二千
石仲康傳其家學居官守道益培厥植故位至司徒子孫衣冠終
漢世史不絕書大夫文安世家至先中丞公益顯大夫復德政若
是名位極人臣所不必言裕後當彌昌與仲康雖顯其視大夫受
上知宴賚諭勉之異數則未如也熙朝令臣軼美前哲好善者所

願見而思企及之者故不荒陋之情而樂書之資賢是鑒中牟之
民其永於休哉大夫名緘字伯默別號四槐隆慶辛未進士以其
年十月視篆今考二載績云余旣述厥懿因系之銘銘曰 於赫
皇祖闢天閔黎厚生重養設教啟迷建官惟百親民曰令撫綏羣
生乂安四境粵有賢令帝心攸嘉宴賚崇錫陟薦非遐憲憲令甲
曠年一舉塋塋茂臣間時載睹於穆穆宗振是羹章顯允今聖率
考攸行迺勅冢宰循良物色聿惟得人寵之晉接宗伯獻酬大官
供具煌煌金帛實膺異數式宴式班諄諄玉言爾安我黎錫爾駢
繁奔奔王侯子喬世裔尹是中牟政光鳧舄有聞仁愛無間庶平
龍命是荷簡名時膺民之樂止憂念從之曰侯去我曷仰曷儀政

善民安休績種種我頤我穀蓄流我壅我暴載遐寧久我家侯將
去我疇挽其車匪石弗礪胡永厥善勿菱者棠名刻歲覲德澤在
人言行出身懿此敷施運化陽春陽春化普延於九紘經綸匡國
發是山城文子告新曹侯畫一於惟來賢是稽是式

萬歷二年

重修城隍廟碑銘

冉夢松

邑人進士

城隍之神厥義維何蓋古者建邦設都必依山川爲固而築城設
隍所以擬山鑿隍護城所以象川然莫不有神焉主之以保衛生
民捍禦寇敵功至大也稽諸往牒唐宋名賢若張說張九齡祭城
隍之文陸游城隍之記則知尊崇而奉祀之者厥惟舊哉逮我太
祖皇帝剗口元之亂崇百神之禮卽位之初立都城隍廟於京師

又命天下各立廟於府州若縣詔封其神爲監察司民之神且頒儀注凡守令蒞任必先於神誓然後行事其祭之祝詞皆聖祖御製讀之凜然可畏期在陰陽表裏以綏元元否者神且降之尤由是城隍之祠視前代獨隆矣吾牟城隍廟在縣西門內威爽靈顯遐邇欽仰舊俗相沿三月二十八日有香社賽會之享諸技畢集歌樂喧闐邑民赴者肩摩踵接香火之氣浮於霄漢第建自國初迄今垂二百餘年中間廢新不一至嘉靖四十二年廟復傾圮會衆欲繕修之而難其人有道士何來化者慨然一身膺之持尺簿跣足踵門丐施人咸樂與越十有三年勞苦萬狀羣力所萃得金若干木若干石若干磚瓦若干釘灰若干雜糧若干財用旣充乃

召工匠以序而修理焉葺椽楹之朽者飾丹雘之脫者增舊制之未備者自正殿寢宮以及錫肩洪山土地等祠兩廊善惡報應等像內外門墻枋扁欄檻之類罔不整整又於寢宮內設牀帳俱具外塑造膳進膳之司宛肖事生而規模制度視昔大改觀矣工成來化懼混其績置石樹碑懇余爲記余時在告家居每遇正旦必詣廟虔拜祝延親壽仰荷陰佑洪恩欲圖荅報無由也故不敢以不文辭而敬述爲記爰系之以銘銘曰 於赫皇祖奄有萬方稽古正祀首重城隍建廟錫虢保障金湯歷歲旣遠頽宇缺牆來化重修屢易星霜梁棟巍峩金碧輝煌祈禳報賽黍稷馨香神功默運時雨時暘災異不生兆民永康與國咸休享祀無疆

萬歷十二年

明戶部尚書贈太子太保震峯張公墓志銘

葉向高

福清人少保

余居留曹八九載所周旋最久者無如大司徒震峯張公見公敦重樸恭慎密而練事造次不苟心歎以爲真大臣器公以乙巳歲五疏乞歸四得溫旨勉留視事其最後旨下而公沒矣先是公著袖疏草示余所論皆國家大計曰老臣且去以此報國矣病革從牀頭出函封授厥嗣孝廉使馳聞卽前草也其惓惓愛君憂國之意發於至誠有足傷者公訃聞天子使使治葬事諭祭襄事有期孝廉以余知公屬誌而銘之公諱孟男字元嗣別號震峯河南中牟縣人先世諱珪者元禮部尚書十傳至繼祖繼祖娶婁生文敏

文教娶徐生公繼祖文教皆以公貴累贈太子少保南京戶部尚書婁徐皆贈夫人公少凝重讀書僧寮處局戶靜坐吾伊終日齋輩嬉戲公獨否所居近蔡河廢津遼曠蕪穢雖晝日行者常凜凜公常以課藝暮夜往來率有物前導卽雨淖無失足同舍生以異之二十八舉於鄉更三載成進士爲嘉靖乙丑授廣平府推官任雜燕代多豪民黠吏作奸舞文公奏讞精明一裁以法肅然莫敢犯而大意主於平恕不欲以深文見奇常歎曰殺者所以去殺也若以能殺爲快是殺之郵耳徵人當給事六垣而行部使者以小禮望公中之銓曹出爲漢中府同知輿論譁然自同知入爲順天府治中自治中晉刑部員外郎改禮部自員外郎晉尚寶司丞皆

不浹歲則以前屈故在尚寶四歲不遷則新鄭相國尼之新鄭夫人公姑也於公爲密戚意公且暱己公自公事外無私語自歲時謁拜夫人外無私覲新鄭語夫人曰尚寶疎我不念姑也夫人曰姑且如此何有於公公聞之曰非所謂疎也夫朝事不及戚我不敢以官溷公內事不及官我不敢以戚溷夫人何疎之有新鄭以譴去危甚交遊親知皆引匿公獨周旋不避新鄭內愧嘗過公握手流涕曰往者吾少子今忝子矣子毋我怨公笑曰公何言之過也夫能不盡於公也者豈能盡於公也者江陵柄國矯新鄭之爲公自寺丞晉其寺少卿已晉南京太僕寺少卿凡三歲三遷江陵自謂知公公復踴躍無所暱就滿考赴闕客有道江陵意者謂公

宜報謝公曰相君知我我不敢自媚於相君是乃所以報耳坐是復四歲不遷江陵敗公自少卿晉其寺卿已晉太常已晉大理卿已晉工部右侍郎皆在南自南工改北掌通政司事凡四歲四遷在通政嚴出納抑干請權璫關說無所撻甚舉其職又疏請御門裁符章奏語甚切至晉刑部右侍郎改戶左明年晉南京工部尚書又明年改戶部仍南時留計匱竭軍儲不給人皆擾公節縮撙剔不遺餘力檢賦額見逋負日多歎曰夫郡縣之賦其轉輸於司農者無南北一也北多輸而南多逋者北能操守令之殿最而南不能也誠宜重總督糧儲之權覈其舉刺以上下其衡庶人心肅而夙弊可祛矣爲疏具言之報可蓋自公受事時庾粟僅支二

年不再歲遂有七年之蓄本之皆公畫也曹郎以差事有煩言公
劑量其宜著爲絜令至今遵之而蜚語遂騰公引疾乞歸疏四上
乃得請里居五年詔召公守故官力辭不獲乃就公旣明習計事
又前所規畫章程具在申約束謹筭鑰令不煩而事集主藏吏言
金錢且盡無以給軍公總其贏縮而裒益之諸守令聞公在事爭
以遺賦至餉賴以充督儲久闕公攝事且四載勾覈精勤分毫不
漏故事修倉實水衡度支口佐以爲席竹餘羨公悉出罰鍰二千
餘爲建府軍倉三版或語公何乃代司空費公曰彼此其公家耳
何歧視也及再罹浮言杜門求去猶從卧內區畫署中事如分水
兌實倉儲及豁除磨折諸款皆井井有條於是非毀譽之故絕口

不談亦恬然不介於胸中也屬纊時孝廉兄弟環侍作兒女語公
正色曰吾年七十三不爲不壽官至宮保不爲不貴得正而斃復
何憾爾曹何不讜也因令孝廉曰吾方納息靜坐爾且少休頃之
遂瞑爲萬歷三十四年五月二十一日其生爲嘉靖十三年二月
二十六日生平無聲色之好歷官四十餘年清白自持在戶曹日
喪其伯子署中進羨金爲喪費公曰吾寧以私戚累官帑括俸金
償之嘗讀咎繇謨至勤儉兩言歎曰大聖尚爾何況吾儕時揭以
自勵自公之暇不廢覽誦尤篤好史記繕寫數遍搜抉精義用資
官政旣早失怙恃孺慕終身事諸父如父撫羣從如同生自宗黨
外姻以遠閭里無不周卹邑有大繇賴公倡議得免里人尤以此

德之身所獎進人才甚多皆不使知或有自列者惟退然愧謝而已世之不知公者或毛舉細事以相加至於公之處功名進退泊然無所附麗兩當權相一葭莩一知己皆避之若浼能自完其身名此則雖極力洗索者亦不能不心折公也余每觀仕宦之途染指集羶無介而親穴竇而媚顛覆淪胥何可勝數如公之挺力獨行終始一節不與波俱出不與汨俱溺非但履方重道亦可謂知幾識微之君子矣此余之所以慕公而論其大也公娶於祝甚賢能佐公先公没三十三年贈夫人啟攢耐葬賜祭子四民望民表祝出民祭望室魏出殤賀來王出民望娶朱繼冉民表娶和民祭娶田女七婚袁一俊牛應謙侯應瑜朱應俊崔繼楊士龍一俊知

縣應瑜舉人餘俱諸生其一尚幼孫三允元娶耿允亨妻薛元同
聘冉孫女四婿監生劉興詩諸生李向陽楊勝祖指揮應襲白啟
采曾孫二曾孫女三葬於萬歷三十六年某月日墓在縣城東五
里墓邱之原孝廉卽民表有文學能世其家銘曰 仕宦何常惟
其所能知步以躋捷足反躡惟司徒公秉節蹈義懿親當揆遠跡
如鳳權相繼之欲公已比公也竒然毋甘其餌戚我者疏知我者
忌帶則淹迴其究乃利歷踐清曹周流卿寺司空納言地官正位
以爲公償公也何意何避何趨誰德誰懟奉職業官匪躬盡瘁方
其持籌度支告匱悉慮以圖倉廩斯備旣去復來帝心所寄許相
是尊官秩載貳解組未能終其勞勤遺疏陳情九原隕淚生也憂

中牟縣志 卷十一 二十三
危沒猶有莫大臣之義庶其無愧自日幽宮明綸薦賁恩遇始終
可稱備至嗟彼世途纖趨巧媚奉公如遺營私不置迴瀾柱流匪
公曷視我銘其幽以告羣吏

孝廉彭公墓志

國朝 冉觀祖

歲辛卯彭公舉於鄉時予始應童子試仰公鴻名如景星慶雲有
傳予所爲文得公許可者輒心自喜又數年獲交公承以遠大相
勗不見擯棄及癸卯後乃數與公晨夕周旋佩其言師其行令人
久而益服無何公卒且葬其子持狀乞予言以表諸墓予不禁愴
然以志愀然以感也辛卯及今廿餘年耳初焉慕公繼焉識公又
繼焉從公遊未幾而弔公卒送公葬今且表公墓僅一瞬間已成

今古念居諸之遷流傷知交之零落人琴俱亡文獻無徵嗟乎嗟乎又何言哉然馨欬如接懿嫵可述藝擅文苑之長操貞隱逸之列異日國史邑乘將有所採擇焉予忍不爲之表章耶公諱致明字先日號簡文幼穎悟擅神童之譽長博極羣書文多宏肆奇崛故屢試不偶晚遂簡鍊揣摩出入先輩辛卯闈中大爲主司所器擬元數日旁有擠之者因置二十五名公車累上長安中嘖嘖商宮一座待公辛丑僅登副選未竟公志也詩宗陶韋恬淡自適不屑爲雕飾語性質朴與物無忤生平不作詭言矯行以是人罕親就之好與後進談文手自較閱有疵類輒摘出不相掩覆一吐彭門多知名士甘退隱無仕進念而且廉隅自砥不事產業一拓

貨殖請謁未嘗縈懷閉門高卧宴如也祖偉以明經仕五河廣文
父見賓早背奉母張以孝聞避難河朔肩母而行母疾常跪禱湯
藥必嘗公於鴈行居仲兄啟光逝養嫂胡以壽終弟啟華啟照啟
華亡於亂啟照賴公教入庠公原配王氏生子翥有聲鬻序女適
蔡相攸繼萬氏生三女一適安殿邦一適李倫堂一適梁可大孫
應捷應熊應蘆俱業儒以公世德卜之其孫枝森秀正未有艾也
書云惟孝友于兄弟施於有政公雖以家食老而推其學行若使
服官蒞政必當不負君民輿論咸稱公爲真孝廉宗族鄉黨無間
言爰爲之表曰是爲孝廉彭公簡文先生之墓

義士李冠却賊事

宋韓忠彥 黃陽人

李氏祖以布衣處閭巷一旦遇寇盜之將至能挺身奮策使不犯我境而去一鄉之人皆賴而獲免觀乎智勇有足尚者若斯人也逢時得位則功名志節豈易量哉傳曰十室之邑必有忠信於此見之矣六世孫大夫君發揚潛德乃有傳於後可謂善述者云元祐六年十二月春日知樞密院安陽韓忠彥 六世孫李師德元豐中進士

義士李冠全城退賊事

蘇轍 眉山人

盜將入吾邑迎以財遺之此理可以却盜使盜不受而爲暴吾眾必致死此理可以殺盜然倉猝時或荒亂不暇及此李氏祖真智者耶然非有孝子慈孫孰爲信於六世之後者耶元祐七年二月

九日門下侍郎眉山蘇轍題

箴

乘輿箴

爲著作郎時作

晉潘

尼

邑人太常卿

易稱有天地然後有人倫有父子然後有君臣傳曰大哉天地其次君臣然則君臣父子之道天地人倫之本未有以先之者也故天生蒸民而樹之君使司牧之將以導羣生之性而理萬物之情豈以寵一人之身極無量之欲如斯而已哉夫古之爲君者無欲而至公故有茅茨土階之儉而後之爲君者有欲而自利故有瓊臺瓊室之後無欲者天下共推之有欲者天下共爭之推之之極雖禪代猶脫屣爭之之極雖劫殺而不避故曰天下非一人之天下

下乃天下之天下安可求而得辭而已者乎夫修諸己而化諸人出乎邇而見乎遠者言行之謂也故人主所患莫甚於不知其過而所美其美於好聞其過若有君於此而曰予必無過雖其言而莫之違斯孔子所謂其庶幾乎一言而喪國者也蓋君子之過如日月之食過也人皆見之更也人皆仰之雖以堯舜湯武之盛必有誹謗之木敢諫之鼓盤杖之銘無諱之史所以閑其邪僻而納諸正道其自維持如此之備故箴規之興將以補過教闕然猶依違諷喻使言之者無罪聞之者足以自誠先儒旣援古義舉內外之殊而高祖亦序六官論成敗之要義正辭約又盡善矣自虞人箴以至於百官非唯規其所司誠欲人主斟酌其得失焉春秋傳

曰命百官箴王闕則亦天子之事也尼以爲王者膺受命之期當
神器之運總萬幾而撫四海簡羣才而審所授孜孜於得人汲汲
於聞過雖廷爭面折猶將祈請而求焉至於箴規諫之順者曷爲
獨闕之哉是以不量其學陋思淺因負擔之餘嘗試撰而述之不
敢斥至尊之號故以乘輿目篇蓋帝王之事至大而古今之變至
衆文繁而義詭意局而辭野將欲希企前賢髮髯崇軌譬猶邱垤
之望華岱恒星之繫日月也其不逮明矣頌曰 元元遂初芒芒
太始清濁同流元黃錯峙上下弗形尊卑靡紀赫胥悠哉大庭尚
矣皇極啟建兩儀旣分彝倫永序萬邦已紛國事明王家奉嚴君
各有攸尊德用不勤羲農已降暨於夏殷或禪或傳三質乃文太

七無名下知有之仁義不存而入歸孝慈無爲無執仁欲何思
信之薄禮刑實滋既譽旣畏以侮以欺作誓作盟而人始叛
煌四國藹藹萬乘匪誓焉憑左輔右弼前凝後丞百萬幾業
兢兢夫出其言善則千里是應而莫余違亦喪邪有繼不機之動
式以廢興殷鑒不遠若之何勿徵且厚味腊毒豐生辛作必
室而夏興瑶臺糟邱酒池象箸玉杯厥肴伊何龍肝豹胎惟此哲
婦職爲亂階殷用喪師夏亦不恢是以帝堯在位茅茨不剪周文
日昃昧旦丕顯夫德輶如毛而或舉之者鮮故湯有德武未盡
善下世道衰末俗化淺耽樂逸遊荒淫沈湎不式古訓而好是佞
辯不遵王路而覆車是踐成敗之效載在先典匪唯入厥世用

殄故曰樹君如之何將人是司牧視之猶傷而知其寒燠故能撫之斯柔而敦之斯睦無遠不懷靡思不服夫豈厭縱一人而玩其耳目內迷聲色外荒馳逐不修政事而終於顛覆昔唐氏拔舜舜亦命禹受終納祖丕承天序放桀惟湯尅殷伊武故禪代非一姓社稷無常主四嶽三塗九州之阻彭蠡洞庭殷商之旅漢夏之隆非由尺土而紂之百克卒於絕緒故王者無親唯在擇人蓋惟舊白首乃新望由釣夫伊起有莘負鼎鼓刀而謀合聖神夫豈藉官左右而取介近臣蓋有國有家者莫云我聽或此尚從莫謂我智聽受未易甘言美狀尠不爲累由夷逃寵遠於脫屣奈何人主位極則侈知人則哲惟帝所難唐朝旣恭四族作奸竊室旣隆而

管蔡不虔匪我二聖孰弭斯患若九德感受僞父在官君其
治臣非君莫安故書美康哉而易貴金蘭有皇司國敢告納言

頌

釋奠頌

爲太子舍人作

潘尼

元康元年冬十二月上以皇太子富於春秋而人道之始莫先於
孝悌初命講孝經於崇政殿實應天縱生知之量微言與義發自
聖問業終而體達至三年春閏月將有事於上庠釋奠於先師禮
也越二十四日丙申侍祠者旣齊輿駕次於太學太傅在前少傅
在後恂恂乎宏保訓之道官臣畢從三率備衛濟濟乎肅翼贊之
敬乃掃壇爲殿懸幕爲宮夫子位於西序顏回侍於北墉宗伯掌

禮司儀辨位二學儒官縉紳先生之徒垂纓佩玉規行矩步者皆
端委而陪於堂下以待執事之命設樽篚於兩楹之間陳罍洗於
阼階之左几筵旣布鐘懸旣列我后乃躬拜俯之勤資在三之義
謙光之美彌劬闕里之教克崇穆穆焉邕邕焉真先王之徽典不
刊之美業允不可替已於是牲饋之事旣終享獻之禮已畢釋元
衣御春服巡齋禁反故式天子乃命內外羣司百辟卿士藩王三
事至於學徒國子咸來觀禮我后皆延而與之燕金石簫管之音
八佾六代之舞鏗鏘闐闐般辟俛仰可以澄神滌欲移風易俗者
固不異矣乎浮哇屏鄭衛遠佞邪釋巧辯是日也人無智愚路無
遠邇離宮返國扶老攜幼不期而俱至皆延頽以視頽耳以聽行

道慕業洗心革志想洙泗之風歌來蘇之惠然後知居室之善著
應乎千里之外不言之化洋溢於九有之內於熙乎若典固皇代
之壯觀萬載之一會也尼昔泰禮官嘗聞俎豆今厠末列親覩盛
美濺漬徽猷沐浴芳潤不知手舞口詠竊作頌一篇義近辭陋不
足測盛德之形容光聖明之遐度其辭曰 二元迭運五德代徽
黃精既允素靈乃暉有皇承天造我晉畿祚以大寶登以龍飛宣
基誕命景熙遐緒三分自文受終惟武席捲要蠻蕩定荒阻道濟
羣生化流率土後帝承式不隆曾構奄有萬方光宅宇宙篤生上
嗣繼期挺秀聖敬日躋濬哲闕茂留精儒術敦闕古訓遵道讓齒
降心下問鋪以金聲光以玉潤如月之升如乾之運乃延台保乃

命學臣聖容穆穆侍講間抽演微言啟發道真探幽窮蹟溫故
知新講業既終精義既研崇聖重師卜日告奠陳其三牢引其四
縣旣戒旣式乃盥乃薦恂恂孔聖百王攸希豐豐顏生好學無違
曰皇儲皇體神合機兆吉先見知來洞微濟濟二宮藹藹庶寮俊
又鱗萃髦士盈朝如彼和肆莫非瓊瑤如彼儀鳳樂我雲韶瓊瑤
誰剖四門洞開雲韶奚樂神人允譖蟬冕耀庭細佩振階德以謙
光仁以恩懷我酒惟清我肴惟馨舞以六代歌以九成莘莘胄子
邴邴學生洗心自百觀國之榮學猶蒔苗化若偃草博我以文宏
我以道萬邦蟬蛻矧乃俊造鑲蚪瑩珠剖石搗藻綵匪元黃水罔
方員引之斯流染之斯鮮若金受範若埴在甄上好如雲下效如

川昔在周興王化之始曰文曰武時惟世子今我皇儲濟聖通理
緝熙重光於穆不已於穆伊何思文哲后媚茲一人實副元首孝
洽家邦光照九有純嘏自晉永世昌阜微微下臣過充近侍猥躡
風雲鸞龍是廁身藻芳流日玩盛事竭誠作頌祇詠聖志

蠲漕頌 并序

國朝 冉覲祖

皇上御極之三十年四方無虞兵革不用躬尚節儉物力贏餘於
是帑金時出宿逋肆赦自今年以及明歲正賦率多蠲免
恩膏最溥乃猶

軫念頻年漕輓竭東南之民力乘此國用饒裕可概行蠲免令其
少寬而以儲蓄宜豫又不可歲無所入因按年分省蠲此徵彼期

不數年無不徧及下既蒙庥上復有備法至善也是舉也民鮮籲
天之聲臣無封事之奏而

皇上於深宮之中惻然興念行之不疑是知我

皇上無時不念周民瘼而芸芸蒼生無一不涵育於

聖度內也本之以仁斷之以義

聖德高深誠難名狀愚氓感戴徒有憧憬鼓舞而已小臣叨與文
史之末躬逢盛事不能自已敬獻頌章頌曰

帝光格被景運聿隆海宇甯謐戢戈囊弓度支不匱太倉粟紅家
給人足猶屣

宸衷謙以持清儉以處豐爲蠲爲賑膏澤無窮惟此漕粟東南之

輸歲有定額軍國攸須舟連於水車接於途誼固應爾急公忘
性

帝念哉民力曷紓無有遠邇悉爲蠲除省以歲分

皇恩均受國用無絀民財孔阜意美法良垂模可久徵諸往牒振
古未有居者蒙安加額以手行者獲息謠吟在口憶昔漢文蠲租
僅半感茲深仁江河瀾漫不謀於衆特出

宸斷溫語春回天章雲燦荆揚竟豫懽傳早徧億兆傾心永永清
晏

御書十六大字頌

冉觀祖

皇上御極之三十二年閏五月十九日

特召翰林院諸臣晨集起居館出

御書四匾十六大字將以頌之河南開封府之禹王廟孟子遊梁祠其二則懸之嵩嶽淮瀆二廟展示羣臣一時莫不懽忭鼓舞揚頌之聲徹於殿陛臣生長河南銜感尤切仰繹四匾命字之義曰功存河洛者知中州爲河洛經流祀禹以其功而凡今日之安居粒食皆

皇上所深念也曰昌明仁義者孟子七篇仁義二字括盡大指於遊梁首陳之而託諸空言在當時爲不遇

皇上揚仁義以示人此孟子千載後之知遇而仁義之教當收之今日矣曰嵩高峻極靈瀆安瀾者嶽峙瀆流各受其職而其因

布化宏育萬物自能與

皇仁浩蕩默相裨助也肅觀其字徑不踰二尺而有尋丈之勢運筆圓而健結體整而密隨意揮灑無補綴變積之態信古今奇觀也因思從來帝王功德隆盛者鮮兼藝事而我

皇上兼之萬幾之暇游心翰墨學與姿輔法以悟融於此十六字如見周天之一宿其垂光於碧落者正未可量也昔人論王羲之書曰龍跳天門虎卧鳳闕論徐浩書曰怒猊抉石渴驥奔泉臣雖習聞其語未諳其妙今敬瞻十六字曠然有會焉龍跳者言其生動而夭矯也虎卧者言其靜重而端嚴也猊之抉石言勁力之有餘驥之奔泉言迅往而莫遏也臣知王徐二子不足擬

御書而畧其分之相懸取其論之不謬亦於無可形容之中舉其
髮髯云爾然臣猶有私幸者是日諸臣仰瞻臣廁其末後此犬馬
齒衰蒙

恩放還優游田里更得周遊數百里間重仰四區宛如內庭侍從
瞻望

天顏時榮感曷有已耶中州之寶重固當傳諸萬世禹孟嶽瀆之
祀典借以不墜矣臣不揣愚昧敬爲之頌曰 遐哉惟禹功存河
洛崇基遠宇於梁之郭

御書流輝羣羨且愕力運千鈞有同疏鑿

其

孟子遊梁昌明仁義

天德王道一源無二廟貌聿新

宸章寵賜泰山巖巖罔敢褻視其高高峻極禮視三公長養萬類
主德宅中琳宮有赫華匾凌空如山之筆與嶽並雄淇滔滔靈瀆
安瀾胥慶潤物功宏趨海流正

翰墨星懸馨香鼎盛誠靡不格率職承

命騏援毫迅掃電掣風驅體兼衆妙力與韻俱一十六字數協

虞握管若椽古帝所無館閣傳觀踴躍歡呼 州是寶萬世垂模

其

贊

太子少保張公像贊

明 李廷機

緇衣而素履圓用而方體而息深深而度几几與終日談無譽毀

與經年處無慢侈冬日趙衰春厲伯子周鼎商彝不施績采璞玉
渾金不事剗削故仕若干切之山陟則崔嵬而進則邈邈福若萬
頃之浸浩無津涯亦混無終始斯非天地之中具茨洛之區鍾粹
毓和蔚然而起者耶

賦

籍田賦

晉潘岳邑人黃門侍郎

伊晉之四年正月丁未皇帝親率羣后籍於于畝之甸禮也於是
乃使甸師清畿野廬掃路封人墼宮掌舍設板青壇蔚其嶽立兮
翠幙黹以雲布結崇基之靈址兮啟四塗之廣阡沃野墳腴膏壤
平砥清洛濁渠引流激水追阡繩直邇陌如矢繚轡服於縹輶兮

新轅綴於黛粘儼儲駕於塵左兮俟萬乘之躬履百僚先置位以
職分自上下下具惟命臣襲春服之萋萋兮接游車之轆轤微風
生於輕幘纖埃起於朱輪森奉璋以階列望皇軒而肅震若湛露
之晞朝陽眾星之拱北辰也於是前驅魚麗屬車轡萃蜀蜀河起
參塗方駟常伯陪乘太僕秉轡后妃獻種陸之種司農撰播殖之
器挈壺掌升降之節宮正設門閭之蹕天子乃御玉輦蔭華蓋衝
牙錚鎗綃紈絳繒金根照耀以炯晃兮龍驤騰驤而沛艾嗚銜
於離坎飛青縞於震兌中黃羣以發暉方綵紛其繁會五輅鳴鑾
九旗揚旆瓊鍛入藥雲罕晡藹簫管嘲嘈以嗽嘈兮鼓鞀磁隱以
砰磕筍虛崑以軒翥兮洪鍾越乎區外震震填填塵驚連天以幸

乎籍田蟬冕頰以灼灼兮碧色肅其芊芊似夜光之剖荆璞兮若
茂松之依山巔也於是我皇乃降靈壇撫御耦游場染屨洪縻在
手三推而舍庶人終畝貴賤以班或五或九於斯時也居靡都鄙
民無華裔長幼雜選以交集士女頌賦而咸戾被褐振裾垂髻總
髮蹠踵側肩倚裳連襪黃塵爲之四合兮陽光爲之潛翳動容發
音而觀者莫不怵舞乎康衢謳吟乎聖世情欣樂於昏作兮蠶
力乎樹藝靡誰督而常勤兮莫之課而自勵躬先勞以悅使公豈
嚴刑而猛制之哉有邑老田父或進而稱曰蓋損益隨時理有常
然高以下爲基民以食爲天正其末者端其本善其後者慎其始
夫九土之宜弗任四人之務不一野有菜蔬之色朝靡代耕之

無儲積以虞災徒望歲以自必三季之衰皆此物也今聖上味且
丕顯父惕若慄圖匱於豐防儉於逸欽哉欽哉惟穀之恤展三時
之宏務致倉廩於盈溢固堯湯之用心而存救之要術也若乃廟
祧有事祝宗諏日簠簋普淖則此之自實縮鬯蕭茅又於是乎出
黍稷馨香昔酒嘉粟宜其民和年登而神降之吉也古人有言曰
聖人之德無以加於孝乎夫孝天地之性人之所由靈也昔者明
王以孝治天下其或繼之者鮮哉希矣逮我皇晉實光斯道儀刑
孚於萬國愛敬盡於祖考故躬稼以供粢盛所以致孝也勸穡以
足百姓所以固本也能本而孝盛德大業至矣哉此一役也而工
美具焉不亦遠乎不亦重乎敢作頌曰
思樂甸畿薄採其茅大

君戾止言籍其農其農三推萬方以祇禱我公田實及我私我簠
斯盛我簋斯粢我倉如陵我庾如坻念茲在茲永言孝思人力普
存祝史正辭神祇攸歆逸豫無期一人有慶兆民賴之

秋興賦

并序

潘岳

晉十有四年余春秋三十有二始見二毛以太尉掾兼虎賁中郎
將寓直於散騎之省高閣連雲陽景罕曜珥蟬冕而襲紈綺之士
此焉遊處僕野人也偃息不過茅屋茂林之下談話不過農夫田
父之客攝官承乏猥廁朝列夙興晏寢匪遑辰寧譬猶池魚籠鳥
有江湖山藪之思於是染翰操紙慨然而賦於時秋也故以秋興
命篇其辭曰 四運忽其代序兮萬物紛以迴薄覽花蔕之時育

兮察盛衰之所託感冬索而春敷兮嗟夏茂而秋落雖末事之榮
悴兮伊人情之美惡善乎宋生之言曰悲哉秋之爲氣也蕭瑟兮
草木搖落而變衰慄慄兮若在遠行登山臨水送將歸夫送歸懷
慕徒之戀兮遠行有羈旅之憤臨川感流以歎逝兮登山懷遠而
悼近彼四感之疚心兮遭一塗而難忍嗟秋日之可哀兮諒無愁
而不盡野有歸燕隰有翔隼游氛朝興稿葉夕殞於是乃屏輕箑
釋纖絺藉莞蕩御袷衣庭樹槭以灑落兮勁風戾而吹帷蟬嘒嘒
以寒吟兮雁飄飄而南飛天晃朗以彌高兮日悠揚而浸微何微
陽之短晷覺涼夜之方永月朧朧以含光兮露淒淒以凝冷熠燿
粲於階闔兮蟋蟀鳴乎軒屏聽離鴻之晨吟兮望流火之餘景宵

耿介而不昧兮獨展轉於華省
惜時歲之適盡兮慨俛首而自省
斑鬢影以承弁兮素髮颯以垂領
仰羣雋之逸軌兮攀雲漢以遊
騁登春臺之熙熙珥金貂之炯炯
苟趨舍之殊塗兮庸詎識其躁
靜聞至人之休風兮齊天地於一指
彼知安而忘危兮故出生而入死
行投趾於容跡兮殆不踐而獲底
闕側足以及泉兮雖猴猿而不履
龜祀骨於宗祧兮思反身於綠水
且斂衽以歸來兮忽披紱以高厲
耕東臯之沃壤兮輸黍稷之餘稅
泉湧湍於石間兮蒸揚芳乎崖溼
深秋水之涓涓兮玩游鯈之灑灑
逍遙乎山川之阿放曠乎人間之世
優哉游哉聊以卒歲

傷民賦

國朝

胡宏度

天門
邑令

中牟之災於旱潦黃河也歷十有餘載矣庚戌夏秋之交復淫雨
彌月益之賈魯之水秋禾半沒廬舍亦圯人之殞於水者比比而
西郭之女且斃於牆顛沛之狀不忍見聞乃感而賦賦曰
在河之濱每患德水衰延不逮十舍版籍多於千軌其南紛纒沙
磧回抱如隄坎之復聚庶蓂莫施其北鱸畱理腴腴原陞歛齷齪
以僕僕或鹵澤以浥浥廢憂憂之良耜思或昧而憂悒西則新荒
於沙東則常苦於濕牟之地亦不利於民矣旱魃趁暴於先馮夷
流毒於後雨暘不時風多怒吼是復不過於天地也於是

覃澤遠敷四野濡沃興築浚之役而口藏復畱畬之賦而不錄大
事鍼砭盡起民瘼靡佗際而怔忡深感惕而力作是以管之日未

嘗粵逢擊曳而入於惡也胡爲悲鳴田翁牧豎復業幾何今復淫
雨爾其如注也則翳醜覆覆醜覆寥寥二氣薄感威益豐隆澆澆
黻黻雲滄自東猗颯助雪颼颼其中霏霏霖霖莫知所終連妖氛
韜紅霞阻羲和之御蒙織阿之車周一月以暄霏漲金水而咨嗟
引鷓首於隣粼波澹澹以無涯漂黃團於浪裏樂白水於凹窪圯
壕埒以千堵沒茅茨以百家若乃吉貝歌而脫柎菽荅黠而黠莢
蕤蕤藁芭穉穉經灑春以沈壓秆秆稭稭穉穉還痿散乎飄颻
粉視罔積秉筮不納醮或見其埽塢難繼其宿沓沙不可羹奚戒
毋嚙魚不餌於澆沈黽入夜而閣閣至若卷澆以奮遠須慮長
而頻覆泣黻黻於波心葬白徒於魚腹徒節而往與流永渡雲濤

暫息零零滴屋驕春造積聲凌裂竹觸者惜於秦力乃銷骨而判
肉之子歸寧溘然不祿何雨之殃民較去日而毒也傷民怵悒羈
客恓悲望漉漉之不竭心翬翬以縈思出蒸庶於沈溺登王道以
坦徠此放廢所不及而賢宰其在茲乎

四言詩

家風詩

晉潘岳

縮髮縮髮髮亦鬢止日祇日祇敬亦慎止靡專靡有受之父母鳴
鶴匪和析薪弗荷隱憂孔疚我堂靡構義方旣訓家道穎穎豈敢
荒寧一日三省

大堂落成頌

國朝冉觀祖

白雲鼎元 卷一 六 三
巖爾牢邑代著循良仰惟漢令偉矣仲康誰其企之見諸羹牆昔
也扶風今也高陽牟俗方頽有弛無張民聽不肅缺彼堂皇韓侯
振興若網在綱鳩庀惟勤革飛在望朴其丹堊堅其棟梁物不價
竭民樂趨踰萬年之基美政遺芳三異休風聯翩頡頏後賢有作
永範斯堂

五言古詩

金谷集作

晉潘岳

王生和鼎實石子鎮海沂親友各言邁中心悵有違何以敘離思
攜手遊郊畿朝發晉京陽夕次金谷湄迴谿縈曲阻峻阪路威夷
綠池汎淡淡青柳何依依濫泉龍鱗瀾激波連珠揮前庭樹沙棠

後園植烏桲靈囿繁石榴茂林列芳梨飲至臨華沼遷坐登蓬閣
立醴染朱顏但慙杯行遲揚桴撫靈鼓簫管清且悲春榮逝不
歲寒良獨希投分寄石友白首同所歸

河陽縣作二首

潘岳

微身輕蟬翼弱冠忝嘉招在疚防賢路再升上宰朝猥荷公
議舉連陪廁王寮長嘯歸東山擁耒耨時苗幽谷茂織葛峻巖敷榮條
落英墮林趾飛莖秀陵喬卑高亦何常升降在一朝徒恨良時
小人道遂消譬如野田蓬幹流隨風飄昔倦都邑游今掌河朔
登城眷南顧凱風揚微綃洪流何浩蕩修芒鬱岿誰謂晉京
遠室邇身實遼誰謂邑宰輕令名患不劬人生天地間百歲孰能
要

日有異雨
卷十一
三十一
頗如鼓石火警若截道颺齊都無遺聲桐鄉有餘謠福諫在純約
害盈由矜驕雖無君人德視民庶不恍

日夕陰雲起登城望洪河川氣冒山嶺驚湍激巖阿歸雁映蘭時
游魚動圓波鳴蟬厲寒音時菊耀秋華引領望京室南路在伐柯
大厦緬無覲崇芒鬱嵯峨總總都邑人擾擾俗化訛依水類浮萍
寄松似懸蘿朱博糾舒慢楚風被郡邪曲違何以直託身依叢麻
黔黎竟何常政成在民和位同單父邑愧無子賤歌豈敢陋微官
但恐天所苟

在懷縣作二首

潘岳

南陸迎修景永明送末垂初伏啟新節隆暑方赫曦朝想慶雲興

夕遲白日移揮汗辭中字登城臨清池涼颺自遠集輶襟隨風
靈囿耀華果通衢列高椅瓜瓞蔓長苞薑芋紛廣畦穉栽蕭芋芋
黍苗何離離虛薄乏時用位微名日卑驅役宰兩邑政績竟無施
自我違京輦四載迄于斯器非廊廟姿屢出國其宜徒懷越鳥志
眷戀想南枝

春秋代遷逝四運紛可喜寵辱易不驚戀本難爲思我來冰未泮
時暑忽隆熾感此還期淹歎彼年往駛登城望郊甸遊目歷朝寺
小國寡民務終日寂無事白水過庭激綠槐夾門植信美非吾土
祇覺懷歸志眷然顧鞏洛山川邈離異願言旋舊鄉畏此簡書慰
祇奉社稷守恪居處職司

三月三日洛水作

潘尼

晷運無窮已時逝焉可追斗酒足爲歡臨川胡獨悲暮春春服成
百草敷英蕤聊爲三日遊方駕結龍旂廊廟多豪俊都邑有豔姿
朱軒蔭蘭皋翠幙映洛湄臨崖濯素手步水褰輕衣沉鈎出比目
舉弋落雙飛羽觴乘波進素俎隨流歸

贈河陽詩

潘尼

處生化單父子奇泄東阿桐鄉建遺烈武城播絃歌逸驥騰夷路
潛龍躍洪波弱冠步鼎鉉旣立宰三河流聲馥秋蘭摘藻豔春華
徒美天資茂豈謂人爵多

贈滎陽太守張子仲

潘尼

大晉盛得人儲宮畜髦士吳侯降高質剖符授千里垂覆豈他
廻光臨桑梓寮類感歧路黎庶思知恥老氏踰小鱗曹泰寄獄
無謂敝邑陋覆篲從茲起

祖道畢雍孫劉邊仲潘正叔

陸機

皇儲延髦俊多士出幽遐適值時來運與子遊承華執笏崇賢力
振纓層城阿畢劉贊文武潘生蒞邦家感別懷遠人願言歎以嗟
夕次圃田居

唐祖詠

前路入鄭郊尚經百餘里馬煩時欲歇客歸程未已落日桑柘陰
道林烟火起西還不遑宿中夜渡京水

懷中牟張林宗孝廉

明徐勣
閩縣人

驅馬出京邑遊子思故鄉秋氣正蕭瑟白露爲清霜言念同心人
送我河之梁中懷轉於邑別緒重慘傷洛城遠迢遞閩海何蒼茫
睽離歷年歲隔越成參商寒蟲倏夜語哀雁方南翔感此不能寐
鬱鬱煎愁腸圃田在何許萬里徒相望

哀李烈婦王氏

莫舜驥

山陰人
邑丞

草木有枯苑不改惟青松婦節松堪比衾穴矢相從王氏生田舍
貞淑性所鍾歸李操井臼北堂足朝饗盥田敬如賓遠躡古人蹤
鸞鏡忽分張茹蘗稱未亡鵲啼春月破雁唳秋夜長殘燈照孤影
黯焉神慘傷阿姑利多金通媒議嫁媼兼之爰貪餌往愬反受撻
膏雨歸其室長號籲彼蒼抱兒淚涓涓死別誰復憐引刀恨不平

深夜赴井泉吁嗟紅顏婦義不負所天執玉體微珥殞身求自全
身死心不沒名與山河傳

挽劉烈婦姚氏

國朝

胡宏度

吁嗟姚氏女伉儷事劉郎日奉姑嫜孝事親井臼良賢勞聞閭里
倡和叶鸞鳳雨載恩情洽一朝夫婿亡胸橫愁百結淚滴血千行
覽鏡惟孤影衣身盡皓裳風吹連理木雨斷九迴腸賦性同金石
捐軀向擁梁冥中歡會杳墓側挽歌長皎皎清秋月淒淒午夜霜
飄然無異志逝矣有餘芳我欲標貞烈吟成轉可傷

列子祠

桑詒元

浙江人

我生亦好遊獨往意汗漫先生口性熟脫棄陳跡踐官粟不妻子

野屨只里閨言類接輿狂形異琴張慢窮老隱深霧元豹無人見
圃外度靈風拂水冷然善

辛母朱孺人節孝詩

粵

光

原武進

兩間無節義奚以振綱常天上無旌表誰知潛德光惟茲松柏操
姓字有餘芳生死何難易苦甘詎較量賢哉辛母節守義稱未亡
誓水生前矢茹蘖苦備嘗爲難不爲易願期九原償堂上頭已白
貌孤口正黃繼慈年六十起居賴扶將荻畫杼邊月提撕懷義方
鹿鳴幸早達麟趾兆家祥胡爲溘霜露栝捲抱慘傷辛母庶無憾
泉下慰三喪銘德詩裁錦

褒魂丹鳳翔我來一薦藻靈節神周行歎息不能已清芬馥古香

七言古詩

登岳陽至中牟懷臺省諸君子

明 胡縉宗

臺省翼翼臨大河諸公賞雪情若何今年瑞雪亦既定明年瑞雪
定復多錦瑟瑤琴動四筵請聽白雪房中歌一倡一酬月忽
光雪色流金波我來梁國春已動欲和陽春裁輕羅賞春宜與
雪異但願攜酒朝鳴珂賞春賞雪豈在酒且看嵩岳青嵯峨

皂角菴贈三明上人

先太保垂髫時
手植今合抱矣

張民表

皂角樹高三十尺孤踪靜倚心如石焚香禮佛話無生我願與師
數晨夕

尋潘安仁墓同徐存永張子掾徐聖藻

王祚昌

涇陽人

秋陽午過涼颼起登城野望山爛紫西郊灌木遍岡巒荒原孤塚
何纍纍爭傳墓側有安仁景悅流風若未死四人乘輿出闈闈散
步林泉尋故址寂寂村墟遺後人老叟聞名驚相指一邱隱伏傍
沙眠棘薪環列叢如崑白楊古樹風蕭蕭栽花滿縣曾餘此落籜
疑聞蘸筆聲鸞鳳和鳴賦未已可有當年袖果姬還來執得桃與
李才人可久是芳名千載憑弔偏自喜

庚子仲夏過中牟謁香爲宗兄明府喜邑志新成擬古頌之

吳宸誥

福建人

邑志攸闕通記室納貢陳風胥吏律豫野提封最圃田新王懷古
遺稽實知君史紀廷三冬上掩南狐下剗宗抵仁德鷺鶴眼拭中

承已指切猶龍憲行嚴促遑辭瘁忌緣粉本充全義矧當兵燹十
番餘巨貲求購無完字以身作獻具能文秘書肉譜括方聞川原
高渺隨心出人物湊繁較品分天邊曦馭曷長杲地下劫灰經幾
掃陵祠宮廟悉荆榛王侯將相復誰保昔有今無事孔傷昔無今
有制須詳忠孝貞廉魂不替青猿白馬水山鄉梨棗秋風清且冽
此道尋真案如鐵但秉夷齊不易心何避桓奸門戶說口口言與
相衡歛升沉品類弈時觀等君政媿應奚似頡頏魚頭子氏潘德
行文章往並勗斑管金銀仿古錄讀書之日恥書生作吏之時嗤
俗吏茲志成時神鬼驚向誰論討向誰評輿圖貢賦如椎畫詩賦
誅銘感六丁閱歲甫周三百度森然珠玉駢章句總由別集彙前

賢却乃胸中罔顧數國門懸置賞千金呂氏當年疇嗣音豈弟宏才備虎觀多應聞望越雞林

不愧教職歌贈學博宋先生

國朝 冉覲祖

國家養士七十年煌煌功今日星懸慎選碩儒端師範本爲鸞鳳非鷹鷂比來學校漸榛蕪名教墮弛誰仔肩饑饉洊臻逋賦積多士劬勩廢簡編追呼頻煩胥役惡繩加士頸奮老拳繫獄加扑勢不已士氣萎荏誠堪憐先生筮仕主牟庠考藝觀德鐸音宣目擊時事發浩歎力噓枯槁使蕃鮮每爲貧士代完租慷慨不怙囊中錢獄者釋兮扑者宥委曲營救總安全不作妾婦取容悅豈效青蠅趨腥羶孤琴獨撫無與和菴齋靜攝擁寒氈自念先世清白吏

身居師席豈徒然加意培植無戕害不愧教職斯爲賢予泰史臣
職載筆矢公揚善贈此篇將來採錄入史乘留與學宮百代傳

傷田家

紀壬寅河決
也時家萬勝

冉覲祖

中牟從來地苦磽半是黃沙半是茅日夜勤勤輸公府豐年不辦
朝夕肴今歲禾黍鬱芊芊河水突至盡成川展轉自傷還自慰爭
道河水可肥田河水日長無止期噴來黃沙沒腰肢父老曾憶前
朝事嘉靖年間似此時一十八水變爲沙父子攜持歎化離哭聲
干霄不可聞九閭杳杳那得知屈指今昔無多日不謂河水復如
茲欲留已無餽口具欲去誰能一葦渡長跪合辭告河伯河伯駢
爾斂狂怒但令有路置此土付與河伯任傾注

題黃烈婦許氏

冉觀祖

飛瓊只合瑤池住
幻出銀河雙星渡
雲中彩鳳羽
翩垂藥餌竟作
齊眉具
五載霜閨稱未亡
幾回腸斷黃鸝句
芳魂已逐青練履
鬱原頭連理樹

東南城上魁樓落成

許嗣衡

邑八座

爲攬魁樓勝
試作魁樓歌
牟陽自昔人文地
馨傳前輩掇巍科
曾有魁樓倚
天立金碧輝輝映城阿
一從頽廢四十年
淒涼遺墟不堪過
廣川帷中漫讀書
長安陌上鮮鳴珂
明府吳公越之彥
來臨我牟惠政多
痼瘵全甦廢皆興
爰勤鳩尾及時和
斧斤雷動無煩呼
瓦甃鱗集不加訶
樓成上與紫極連
岡陵相對鬱嗟哦
多土爭

欲致青雲撫茲形勢奮吟哦樓乎樓乎鎮常在明府德意應不磨

五言律詩

中牟道

明彭而述鄧州人布政使

濁流無定渡走馬逐風湍纔至河南岸始知薊北寒
隋隄楊柳春雪苑故宮殘廿載兵戎事行人掩淚看

城上示諸文學

張民表

固是絃歌邑驚傳戰伐場詩書豈灰燼勘定乃文章
宵鼓嚴春旛引勢長南陂新水長河漢接微茫

蒲蘆亭泛舟

張民表

積水盤渦滿浮舟酒渚遙犯星明滅眼牽浪淺深腰
費日勞茲

乘閒悟此宵天風秋更好須趁露波邀

細葦抽風韻團沙疊水紋鳧鷖疑對過魚觸暗中分舟側不容
波生屢濺裙喧囂迷渡處昏黑坐相聞

寒水炤肝肺明星出復低未能別境外且向此城西問圃他家
便身我意迷市林空闊處亦可當幽棲

主人頗稱靜客到也如閒爲有宅臨水應將臺作山登來看蒼
涉處弄潺湲欲續滄浪詠思清好罷刪

退耕清上之田寄阮太冲

張民表

我久住清陽亭臯樹影涼友朋殊在念雞黍未能將去子
堆書滿一牀與和端自盼重約醉青裳

憩水月菴

晉淑軾

洪源人
邑令

此菴幽秀甚久矣著中牟僧意雲山靜禪心水月浮焚鑪憐萬姓
滌慮想高秋何敢譚恭異攜琴且自遊

己亥夏從沐回憩水月菴

國朝

沈荃

華亭人
副使

紺閣臨平野金燈照上方寺幽宜水月僧老話滄桑竹外薰風細
松間日影長熙然此暫憩身世入清涼

中牟道上

徐延壽

閩縣人

曉別廩延路行行百里程山來中嶽近水入小河清官渡曹瞞曼
人烟管叔城野香吹不斷知是麥初生

昔日興亡事停鞭問水濱牛耕荒後地馬蹴戰時塵破寨曾經寇

空村不見人文章葬黃土特爲弔安仁

鄭國有原圃蒼茫一望間低田多受水積土便成山跪乳羊羣白
將雛雉子斑傳聞尼父氏曾此駐車環

汴河流不定梁苑望非遙隄決防瓠子車行載柳條客心憂道路
民力苦征徭魯令傳三異遺風似漢朝

哀李烈婦王氏

毛鳳翼

邑人舉人

阿婆真不諒逼嫁日相侵懇交逢其怒拋兒割此心清操能自
正氣豈終沈蓬戶蒙旌典輝輝照古今

前題

冉觀祖

男子誰完節貞操有婦人綱常猶未墜血性此爲真奪志難違舉

捐生信絕塵哀哀諫父語聞者共酸辛

婆也豈奇貨父兮利白金竟拚教子志早決狗夫心頸血誰能灑

井泉終自沈

自刎不死
夜復投井

牟山留正氣天地一蕭森

韓父母重構蒲蘆亭賦以誌喜

冉覲祖

遺愛深喬父芳型見此亭苔紋封斷石詩句帶餘馨不日徵神造
絕塵占地靈新流隨雨足吾欲問冥冥

東南城上魁樓落成

冉覲祖

雅意培風氣鳩工地効靈城高初聳碧郭近總環青影入波中水
光連天上星吾伊聲四起多士自橫經

訪官渡

桑調元

官渡知何處蒼茫想舊城曹袁遺壘失煙雨綠蕪平大地幾龍戰
空天一鶴迎無窮家國事物外詎關情

宿水月庵

許 葵

海寧人
許州牧

暝色迷前路疎鐘出梵牆嚴城魚鑰靜荒戍馬蹄忙適口依僧飯
清心愛佛香不眠支倦枕蓮漏滴更長

浩劫恒河界茫茫去未因天邊迷昨夢物外悟前身問法來支遁
參禪半許詢預愁霜月落明發又緇塵

南征卽事

王錫命

溫縣人
教諭

高下瀾無際垂轅任透迤盡皆沙作嶺多是路成河星散人煙少
途窮鳥跡多臨深心益窄勒馬下崇阿

溝自河源發爭傳出佛潭如何成禍水不復作慈曇頽岸噴砂磧
迅流利駿驪年年秋雨至淹沒遍牟南

縣南丈八溝其源發自新鄭出佛潭

七言律詩

魯令祠

明于

謙

錢塘人尚書

長民曾羨魯公賢民物熙然各遂天境外遺蝗徒擾擾桑間駟難
自翩翩閭閻風俗猶前日史傳聲華紀昔年寄語郎官勤撫字循
良衣鉢要人傳

瑞蓮詩爲中牟令郝君賦

楊滋

定興人御史

誰把紅幢種碧流風搖拂起浪沙頭一編最愛濂溪說十丈休誇
太乙舟但借古泉興八政不妨瑞氣見雙毬吾皇頒錄尋符紀先

載人間第一休

魯公政廢郝公來喜見牟山瑞氣回綠水一灣終古在紅蕖兩朵
一枝開也知造物成神妙不是凡庸用翦裁囑爾畫工堪仔細圖
模應得奉三台

瑞蓮詩和韻

黎 臣

長壽人
主事

深紅淺綠滿中流忽見奇花現並頭玩賞主賓開綺席喧歌士女
隔蘭舟葉翻小大檠青蓋房老高低擁翠毬信是賢侯多異政感
徵瑞物應天休

過中牟和壁間韻

宥 齊

沁水
人

逶遲周道偏經巡到處窮簷不見春客久也憐裘葛敵才疎敢厭

簿其類半生踪跡紅塵舊千里風霜白髮新滿目瘡痍成太息隨
車無政答蒸民

古時中牟令王君美用壁間韻

李廷龍

湖廣人河南布政使

廊廷匹馬復東巡民物熙和尙似春河洛已瞻行處好風霜猶見
往來環循良政喜中牟舊獻納才需北闕新燕楚天涯今晤語好
將經濟慰生民

觀風憶昔幾經巡草樹光依滿路春豺虎有聲隨處遁關河無限
望中頻匡時愧我傳俎久戀闕還君對策新千載明良逢盛會堯
天舜日壽斯民

赴大梁臬副任過中牟韓莊示父老

王

臧文安人
邑令

韓莊不改舊牟山攬轡重來鬢已斑
父老尙能談往事兒童強欲識衰顏
未遑揖讓回閭里深愧將迎滿序闌
無奈遮留頻駐馬河梁回首淚潺湲

再過中牟示士子

王 緘

十年杯酒重論文曾許揮毫掃萬軍
隱隱蛟龍天外見遙遙牛斗日邊分
并州故土應憐我沂水新春共喜君
爲問門牆舊桃李班班玉筍已成羣

赴蜀中任過中牟飲蒲蘆亭

喬 璧 星 臨城人邑令

紅塵紫陌走中牟問酒尋花幾度遊
地湧靈泉滋古汴天開勝景壯皇州
灘頭父老來乘輿岸上兒童任詠謳
却喜端陽時節近魚

竿銷口好垂鈎

題見子臺故址

劉時中邑令

名勝相傳見子臺母投陂處脫凡胎當年靜界非常遇此地禪關
自古開水懺經翻風捲葉沙門徑僻雨生苔洞山往事今何在空
有鐘聲月伴來

題魯太師廟

歐學啟長沙人
邑令

魯公經術漢明師爲厭承明出牧時自是靈心調百順豈緣異政
見多奇山河不改當年舊今古猶同去後思愧我重來無寸補干
秋遙自憶相知

寄題中牟劉司寇懷二亭

朱之臣成都人

黃河東走接青淮卜築河陽景最佳亭勢直爭中岳勝雲心惟有
二人懷遙瞻岵岵天盈尺秀拂芝蘭風滿階從此聲名壓阿里三
槐作頌是吾儕

送劉司寇歸中牟

范良彥

虞城人
御史

明發關心百感生故園松菊早尋盟庭餘碣石思先澤家在滄洲
薄吏情倦鳥投時秋葉下懶雲停處暮山平林深迥去人烟遠長
日不聞車馬聲

宦海勞勞鬢影疎百年風木感懷初偶因丹壑開新徑却喜青山
是舊廬石髓流雲和葉掃園蔬過雨帶經鋤高若山翁聞山犬怕

有蒲輪到隱居

虛亭遙應海潭幽大隱遠從物外求覓句偶然思夢草感懷
賦鳴鳩馭回蜀道寧忘險裘敝燕臺肯再遊雜社依稀風雅在歸
雲常滿碧山頭

贈劉岐陽司寇致政歸中牟

侯

詩書人

誤入風塵鬢已霜息機今始解行藏烟霞有待身還健
松菊猶存徑未荒十畝閒居耆社近孤亭新起嘯臺旁
知君杖履盤友處志在鳴鳩第一章

悠悠世路歎浮沉年老纔能返故林五夜頻回清壑夢
千山遙望白雲心溪聲鳥語琴隨弄竹氣花香酒共斟
始信先廬堪歎咏寧遊何事晚抽簪

遙指烟蘿搆此亭
筠牀高卧對山屏
幾朝報主心猶熱
今日由身
夢已醒
樵牧相招皆勝事
兒孫自課有遺經
中原回首成歸計
芳草萋萋色正青

魚倦長游鳥倦飛
歸心日夜向庭闈
小開水竹琤精舍
閒種山花
當綵衣歌入南陔
腸欲斷
夢來北闕事全非
家園此日秋光裏
多
少芙蓉媚釣磯

小築初成擬六休
人間竟似有蓬邱
天開嵩少雲光迴
地接荆河
野望收老驥尚餘
緝繼恨孤鴻豈問
稻梁謀却因霜露
思親淚染
就丹楓萬壑秋

劉岐陽大司寇歸平山懷二亭

孫傳庭

太原人
都御史

圃田遺聖足幽棲永慕寧堪納履遲黃水岸橫官渡北白雲山繞
吹臺西晚菘早韭園蔬好古檜蒼藤隴樹齊雒社非緣娛老關春
秋霜露擁懷題

冉翁載酒過勞城樓

張民表

年逾七十久懸車同里交親復近居正苦衰逢戎馬起對談興想
飯牛餘一杯魯酒情相慰幾句唐詩意亦舒公事私憂應可解便
銷劍戟作耕鋤

簡西城同事邊道見張未

張民表

斗城西顧輔車同數轉燈光曲曲通盡漏虛驚春雁月不眠起舞
夜烏風大驪山動人驅馬官渡波搖劍苑虹何日四郊還氣象便

將杯酒破憂忡

元夜守城作

張民表

當年燈火熏香漏今日烽烟動野燐
睥睨傾光驚斗極星河垂彩蕩城闔
袁曹雄長說官渡韓岳勲高紀汴人
獨俯女牆無可說慟思今古漫逡巡

送張子顧歸中牟

國朝

周亮工

祥符人
詩郎

白水繽紛覆汲闔河干穉子淚沾巾
血痕亂灑程嬰傳漳汴平流李善身
恭敬須常依鼎滌浮沉莫更憶江濱
如予多病難重見好慰波中望爾人

燕惠遠你存水之中牟

周亮工

七千里路苦相依三月長安雪更飛共歎借人又去心憐卽別
未成歸塵沙北地羈臣夢風雨黃河客子衣莫向園田詢古事安
仁詞賦近全稀

徐孺將行不自知遙憐別路雨絲絲河干作客看楊柳馬首逢人
說荔支濁酒閒澆潘岳墓荒城先拜魯恭祠寒家親串能相問爲
頌羈臣北雪詩

中牟對雪

金士忠

御史

誰栽玉樹向天宮風透瑤花飛滿空原圃不分鷗與鷺平山難辨
柏和松豐年豫兆三農喜大有休徵四海同歲暮不辭泥淖路征
人何日出城東

牟山

蘇宏祖

牟峯突兀俯諸山四顧微茫香靄間曉日初昇先頰色宿雲流盡
忽蒼顏遙村錯落青千點古木陰森翠一鬟神與天游時極目御
河影裏舳艫還

白沙曉發

張學林
河陝道
丹徒人

雪皜霜清月更妍共成一色欲明天巖寒客正衝三九瑞兆農應
卜十千踏凍不知泥有筭迎曦漸覺屋生烟最宜僕射陂頭望想
像瀾漫泛白蓮

吳友聖令君牟山署晤徐存永

王祚昌

雄才徐幹舊知名同客相逢官渡城杵白聯交看劍紫圖書對酒

射燈明槐涼院靜三更漏月炤衙閒一榻清漫說茂陵常帶渴主人時重故人情

牟志告成賦贈吳明府

蔡元友

蕭山人

亂餘草創費追尋探得民風感昔今天地大文雖在目山川蘊義得於心入關相國秦中籍出宰郎官宓子琴十志會誇傳虎觀一編新又重雞林

牟城曉望

吳彥芳

闕縣人
邑令

牟山低望一峯明幾曲河流見小清亭上蒲蘆秋水隔村邊楊柳曉烟生農驅小犢開荒坂風送寒鴉下古城父老殷勤無別語殘黎曾苦十年兵

謁魯公祠

吳彥芳

原圃城西拜古祠衣冠猶是漢鬚眉居民解說當年事後輩徒深
異代思豚酒筵前供伏臘雞雛桑下戲童兒先生久著循良傳何
用文章再勒碑

謁魯公祠

林繼焮

極目郊原半覆碑先生不朽獨巋祠飄飄遺範謳思永肅肅丹楹
仰止垂漢代幾更新日月牟民猶拜舊威儀卽今良牧稱慈惠知
是流風百世師

牟城秋眺有感呈吳明府

蔡元友

蒲蘆亭近小城隅水浸南天似鑑湖萬井烟銷多故壘千村人靜

半荒圖干戈欲定悲殘骨生聚初安賴碩膚有令偏能修魯績催
科不見病農夫

謁魯公祠時吳明府興重修之役

蔡元友

河墳北壑古荒祠三異循良百世師草蔓桑枯馴雉在沙飛棟折
漢尊遺衣冠想像非當日伏臘低徊憶昔時仰止清風誰繼美重
輪應屬後賢思

初遊蒲蘆亭同賦

韓蓋光

高陽人
邑令

構得雲簷在蓼汀湖遊招客共揚舡非從薄宦尋佳境爲景前人
愛野亭曲曲新荷浮水碧遙遙嫩柳帶峯青
荷柳皆
本年植漁歌聲送斜
陽晚遠近人家入畫屏

次韻奉和韓年兄遊蒲蘆亭之作

韓蓋光

桃李芬芳媚野汀，邀同載酒上虛舲。
愛茲數頃皆深水，却羨中央一草亭。
不盡鳶魚共玩賞，無邊雲樹足丹青。
若非仙令重來構，應少山光作翠屏。

過魯公祠

在縣西二十里

冉覲祖

司徒名姓遠相傳，拂讀殘碑識漢年。
階受沙侵留鳥跡，像因人愛起爐烟。
童嬉繡陌柔桑下，雉喚夕陽古道邊。
民物熙熙猶未改，幾回翹首望時賢。

乙卯陽月遊蒲蘆亭

與 陳父母韻

曹之錦

儀封人

城外霜寒直似汀，偶來遊日憺漁舲。
且行且息動地北，日韓公

拓舊亭三里烟村疎樹紫十尋雉堞斷雲青羣魚似解遊人意跳躍西山錦繡屏

東南城上魁樓落成

邊惟謙

邑人舉人

振興文事藉循良傑構巖巖起巽方鴟尾霞明通斗極城頭雲擁綉天章俯看湖水魚龍奮近接宮牆桃李芳草舍聯翩爭鼓篋琅琅書韻逐風颺

前題

吳嘉珙

邑人拔貢

魁星應是好樓居鴻構觀成物力餘氣擁湖心披戶近霞橫天半射窻虛翩翩冠蓋來遊盛藉藉郊原起頌初試向膠庠胡士子藜光中夜照讀書

前題

較尉侯

邑人
王貢監

城上初標百尺樓，作人雅意足千秋。
天開筆陣牟山映，地湧墨池湖水流。
萬里風雲欄外起，千家村落座中收。
頻來登眺情無限，看取奎光四遠浮。

謁魯公祠

孫和相

先生政蹟已迢迢，卓異猶聞說漢朝。
百世豆籩今日肸，三春花柳昔時苗。
羊牛下括羞亭長，棖桷聳飛看馴鷓。
嘉穀原生方寸地，化行自爾到垂髫。

經潘岳墓

孫和相

當年曾擲果盈車，指點荒坵一子虛。
花滿河陽留治績，喬遷洛上

識精廬不因文網輕羈縛何至門庭痛翦除舊史誰譏趨世利歷
來辭賦重璠璣

輓同寅辛懋修二首

王於藩

山東人
縣丞

幾歷星霜宦海同好從砥柱憶元功三春花汛泣殘雨五夜柳隄
咽素風論定蓋棺邀

主鑒恩來旌典答臣忠幽魂憑弔知何處淚灑洪流水自東
六年同事感知音磊磊聲華氣宇森大義輝揚先世澤鞠躬盡瘁
老臣心河干盛績垂星日泉下忠魂自古今芳躅猶存人已沒慘
聽流水不鳴琴

戊辰六月河決滎澤中牟適當其衝登城救護水及城腰滿

目流亡詩以紀苦

何鼎貴筑人
邑令

西來濁浪欲浮天浩劫重經廿五年

道光二十三年中
牟決口城鄉爲

忽訝奇災

傳瓠子又驚巨浸沒桑田馮夷怒擁千堆雪陸海平沈萬竈烟愧

殺宰官難障手一回悵望一潸然

扁舟一葉促歸程

時牟邑三堡險工余方奉檄工次聞警得小舟急歸

入耳奔騰萬馬聲遍

地鴻嗷悲永夜滿天龍氣護孤城

時兩龍神降在城中

蕭蕭禾黍空墟壠惻

惻流亡半死生尚喜洪波能洗甲且消氛禋慶休兵

時河南捻匪張逆合數就

誅一律

肅清

戊辰九月放賑舟中雜詩

何鼎

千頃平蕪萬畝田重來愁見水連天村村雞犬憐今日處處桑麻

憶往年露宿尋常成淨土
五五人烟高量荒政無良策

眼流亡媿俸錢

官渡橋

斷黍殘禾壓短蓬
四圍水氣接空濠
船燈明滅秋風裏
爨火荒涼

野寺中

災民避水多在野廟高處

破壘無人猶列雉

水所經處寨堡多陷

孤村有路只

鴻艱難時事逢
今日愁問桑經保障功

傳荒夜泊

孤帆阻絕水中央
四面洪波激混茫
待食饑民憐歎口
傾尊薄酒

潤愁腸空林落葉秋
聲急短榻殘宵夜
氣涼兩鬢霜華搔
不盡在

來滅盡舊時狂

小潘莊阻風

賑船銜尾繞村行
岡阜陂池一片平
尚有殘荷擎夜雨

蔣沖一帶向多荷池

皆陷沒矣
更餘衰葦戰秋聲
人家近岸依魚活

臨水各小村被水後皆以捕魚爲生
霜露

催寒警雁鳴時天氣已寒災民無衣野哭不絕憂患事多難盡寫何如歸去學躬

耕葦塘

水轉帆回面面風所行皆平原積水無所謂上下也扁舟儼在畫圖中沙鷗影小

浮孤白野柿林深隱亂紅種麥有人爭尺土水微落鄉民爭布麥種為裂縫麥看

花無興冷秋叢時署齋菊花感開亦不服賞矣晴波如鏡渾無際壘塊何曾一洗

空茶菴

七言絕句

馬陵岡

唐胡曾

墜葉蕭蕭九月天驅兵獨過馬陵前路旁古木蟲書字記得將軍

破敵年

官渡

明 張孟男

馬頭落日帶沙黃此是曹袁舊戰場人過斷橋頻弔古水聲嗚咽
哭興亡

食舊

張民表

食舊堂前嘉客存百壺清酒歌相喧玉杯不染黃流水却愛吾家
老瓦盆

懷中牟舊事再送存永

周亮工

圃田郭外葦蘆新艇子從人泛早春記得南陂榴苑事廿年不敢

怨風塵

余曾讀書中牟張林宗先生
之榴苑嘗從林宗泛舟蒲亭

蒲蘆亭

國朝

王士禎

新城人
尚書

南郭孤亭野水濱
菰蒲獵獵水鱗鱗
林宗未遠風流在
不愧亭名是塾巾

官渡

王士禛

別駕亡來萬事非
夕陽官渡客行稀
袁家新婦應惆悵
賸與陳王詠宓妃

板橋

王士禛

板橋衰柳日蕭蕭
回首宣和似暮朝
上巳金明池上飲
畫船銜尾駱駝橋

過中牟贈吳友聖令君

談允謙

中牟兵過未畊
無城邑初開賦
不除千古魯公三異政
令從人

不勝書

宿水月菴

張學林

丹塗人
巡道

一路蛩聲送馬蹄
落霞幡影綠楊西
解鞵又借花宮榻
心事逢僧不忍題

溪山猶瀟瀟
綠稻梁祇今真作觸
藩羊夢回殘月空廊白
愛聽鐘魚出短橋

宿水月菴和壁間韻

鄂順安

滿洲人
巡撫

黃塵院外逐輪蹄
流水斜陽萬樹西
打火敲門禪味好
不須詩向板橋題

板橋

張學林

板橋無恙枕盤渦柳未舒條水未波行到忽教棖觸著者回五十
九經過

又過板橋

張學林

津頭又幾過征輪柳色麤麤一換新二十四番風欲盡春寧知我
我傷春

八景詩

牟山北峙

縣北
牟山

王觀生

懷慶人
訓導

尋幽數里一峯生水碧山青拱縣城佳氣鬱葱看不盡常留春色
向梁京

海潭秋月

縣內海
子橋

牟陽城內海潭清秋月澄空夜自明獨倚斷橋閒問水幾經離亂
幾經兵

龍池靈應

禱雨處在
城隍廟後

鹵北城隈綠水漣相傳禱雨有靈淵碧翁偏念牟民苦故遣神龍
灑醴泉

龍脊重樓

衙內龍脊山
上建重樓

牟城縣治似龍蟠霖雨千家浩澤漫春到懶來登畫閣農桑日課
有餘歡

興國晚鐘

每夜
自鳴

欲遠塵心一錫揮疎鐘風送冷漁磯兵戈何事不摧折古寺猶在

衲子衣

魯祠晴暉

漢魯仲康祠在西關

循吏從來重魯勲牟陽三異口碑芬祇今政績誰相似喜有秦

段使君

土山迎翠

縣南土山

荒城芳草自萋萋春日晴雲傍野谿寄語黃鸝勤織柳雙柑載酒

聽君啼

聖佛仙境

聖佛岡相傳有僧幻出一寺以留故人及別化爲烏有

風傳岡上有人聲青鸞回看路已迷當日祇園今已矣至今春草

爲誰萋

龍脊重樓

冉覲祖

攬勝蟠龍脊巍巍百尺名絃歌通巷陌霄漢倚檐楹地迴千家小
天開四野清自公時眺翫民事最關情

興國晚鐘

入靜傳更漏鐘聲初動時偶聞似有擊不識出阿誰過院微風引
入宮清磬隨於今有寶地寂寞對沙彌

魯祠晴暉

廟貌儼千祀行人紛拜趨雲霞燦畫壁香藹散金鋪老樹扶疎影
巢禽次第呼仲康如可作還以庶吾徒

聖佛仙境

當年留客處久矣失招提蒼樹遙天接黃沙小徑迷歸雲幾縷
飛鳥數聲啼乘興時驅馬詩囊負小奚

龍池靈應

不審龍何在相將禱綠波雲興忽變隼雨下已滂沱共說祥能應
祇緣天自和一邱存勝蹟父老有遺歌

土山凝翠

層崖翠欲滴偕友一登臨苔厚行無迹林疎聽有音嵐披古寺隱
沙堆大陵深歸路饒清賞牧兒攢背吟

海潭秋月

澄潭駕彩虹印月淨如空一碧水天今雙輪上下同碓聲急北

雁影墮西風不畏沾衣冷徘徊玉露中

牟山北峙

山勢倚河起蒼崖俯碧流臺池環近郭禾黍接平疇曹壘空遺跡
隋梁不爲舟廢興閱往代自古鎮中牟

牟山北峙

王祚昌

名山不在近雲霄環拱逶迤北望遙最喜畫屏相映帶嵐光午
見危橋

海潭秋月

月映城潭徹底清每逢秋到更光明橋餘瓦礫遊人少勝侶誰爲
阮步兵

龍池靈應

瘞來圭璧共陳辭
仙令誠通甘雨隨
畢竟政和靈異見
賢人心境有龍池

龍脊重樓

聚沙成背起危樓
烟霧騰空瑞色浮
但得從今元氣復
龍蟠隱隱舊中牟

輿國晚鐘

巍然梵刹聳南塘
聞說當年金碧重
舍利久湮頻亂後
沙彌時撞晚來鐘

魯祠晴暉

漢代傳今俎豆輝晴光猶照魯公衣漫言慈愛從來少又見吳
起式微

土山迎翠

沙隄繞郭遍青山芳樹迷離薜荔彎秋霽登城頻野望賢侯新政
有餘閒

聖佛仙境

蘭若曾聞在遠岡須彌何處覓雄王卽今曲水通幽徑宛是當年
鸞嶺長

龍脊重樓

張麟趾

飛樓縹緲踞層巔矯首平臨尺五天一曲琴聲山盡響此中疑有

伏龍眠

興國晚鐘

古刹應於亂後興
石幢猶刻宋時經
上方月出諸緣靜
一院鐘聲

餉老僧

海潭秋月

一水波泓漾月清
潭中不減鏡中明
我來作客逢炎盡
恰值秋生

到處生

魯祠晴暉

漢臣異績在中牟
廟貌摧殘一像留
下馬摩挲碑字古
前山殘照

未曾收

土山迎翠

爽氣朝舒復暮披登樓秋望總相宜
南窗高卧悠然見秀色青青亦自奇

聖佛仙境

誰云作佛不如仙爭羨招提色相妍
閱盡滄桑如一夢至今猶有好名傳

龍池靈應

五風十雨有年書何事陳辭早魃祛
今日吳公多治行甘霖無處不隨車

牟山北峙

孫和相

嵐烟鬱鬱復蒼蒼
遙應七星矗水旁
疑是奇峯天外落
移來郭北鎮牟陽

龍脊重樓

龍脉盤旋枕雉城
樓臺疊峙倍崢嶸
公餘饒有登臨興
琴韻悠悠拂對月明

聖佛仙境

如來何事結塵緣
漫駐平岡作洞天
色色空空卽色休
將幻境憶當年

海潭秋月

潭映月明景自清
秋光正喜滿牟城
橫橋好接霓裳舞
莫認鮫人

淚一泓

興國晚鐘

太平肇建已非新古刹猶存丈六身
遙度鐘聲明月夜夢中驚覺
悟前因

龍池靈應

曾聞當日甘霖零五色雲峯起北溟
自是

聖朝多雨露故教神物顯幽靈

魯祠晴暉

日麗風清正堪娛西郊爛熳瑞雲鋪
漢賢芳蹟今何在稚子祠前
看雉雛

土山凝翠

一帶疎林半罩苔
土山繚繞勢崔嵬
無邊野綠紛如織
好是鴛鴦逐影來

魯祠晴暉

辛來弼邑人
庠生

循良祠宇近牟城
佳氣葱蘢映晚晴
三異刻章邀主鑒
千秋祀典答臣精
曾從虎觀陪經席
更羨魚頭繼直聲
遺愛猶留庭下樹
士人瞻仰拜神明

聖佛仙境

漫道天台事渺茫
奇觀久羨在平陽
浮圖偶現成精舍
過客俄驚到佛場
僧榻款留聊信宿
人間幾度隔滄桑
回頭重認來時路
漠

漠黃沙千仞岡

龍脊重樓

公廨藏山境地寬岡巒回繞似龍蟠重樓百尺臨岩起小閣三楹
過雨寒半畝蒼苔連石砌一庭空翠撲雕欄政閒應有登臨趣好
取瑤琴對月彈

興國晚鐘

寺鐘夜夜響錚然萬籟無聲北斗懸漫擬老僧敲皓月渾同流水
瀉珠泉元音自振何須擊凝夢初回欲問禪應是如來砭俗耳好
從覺地證青蓮

中牟縣志卷之十二

雜記

政治所關則義嚴正史見聞務廣則類取裨編雖傳信傳疑不無
譌誤而奇文軼事亦足以新耳目而資考鏡也類而輯之以備文
獻之徵卽事涉神怪而尙非荒誕者間亦登之其已散見於各志
中者則不再復敘志雜記第十

春秋隱公四年公及宋公遇於清杜預春秋釋地云中牟縣西有
清陽亭互詳山川內渠水註

左傳宣公十二年晉師救鄭楚子次於管以待之高士奇曰此卽
管叔所封之國也管師屬檜檜滅屬鄭鄭滅屬韓戰國策秦攻韓

之管韓非子魏安釐石韓拔管使縮高守管信陵君攻之不下漢
爲中牟縣地晉因之

中牟縣晉屬滎陽郡劉宋仍舊永嘉後淪沒於劉淵石勒諸人
隋開皇初改中牟曰內牟十八年改內牟曰圃田大業初改曰郝
城 按圃田地不盡爲牟境未詳郝城所在缺以俟考

左傳衛侯如晉過中牟管子小匡篇築五鹿中牟鄴蓋與社邱以
衛諸夏之地 舊按自衛如晉管子與五鹿並言均非此中牟

淵鑑類函引說苑晉平公問趙武子曰中牟三國之股肱邯鄲之
肩髀也寡人欲其良令也其令空誰使而可趙武曰邢子可公曰
邢子非子之讎耶對曰私讎不入公門

說苑佛昉用中牟之縣畔設祿邑炊鼎曰與我者受邑不與我者
其烹中牟之士皆與之城北餘子田基獨後至曰基聞之義者軒
冕在前非義弗受斧鉞於後義死不避遂祛衣將入鼎佛昉播而
之趙簡子屠中牟得而取之論有功者用田基爲始田基曰吾聞
廉士不恥人如此而受中牟之功則中牟之士終身慚矣穰負其
毋南徙於楚楚王高其義待以司馬按以上二事皆非今之中
牟原不可引爲此地掌故然牟邑祀典名宦則首列邢伯說苑作
邢子
鄉賢則首列田基相沿已久未可沒也故不爲立傳而錄其軼事
於此俾瞻仰廟貌者有所考焉

縣南六十里許馬陵岡有孫臏龐涓二廟 舊按孫臏殺龐涓於

馬陵在山東兗州府剡城縣今彼處有馬陵山焉牟之馬陵蓋以
涓事梁惠王爲大將軍有召臚至魏刖其足一事中牟屬魏故土
人祀之因以馬陵名岡實非砍樹白書之處也

相傳春秋時孫臏自雲中過中牟行至碧陽橋口天晚宿旅店喚
使者曰今夜有二人來行刺命搬石堆橋邊作八陣圖令人守之
夜半果有二人來一曰張狐一曰袁達及至聞橋邊有殺伐聲遂
迷入陣中不得出臚令使者引出二人頓首而去

漢初平二年朱儁謀討董卓以河南殘破東屯中牟二年爲卓將
李傕等所敗

水經注昔堯太禰之背董卓也問行出中牟爲亭長所錄郭長公

世語云爲縣所拘功曹請釋焉

水經注渠水東逕田豐祠北袁本初慙不納其言害之時人嘉其誠謀無辜見戮故立祠於是 按此則牟境當有田豐祠今無考晉永嘉初東海王越鎮許昌以石勒寇掠兗州遣荀晞等拒之於平原陽平間越出屯官渡爲晞聲援

唐乾符三年山東盜王仙芝等陷陽武攻鄭州昭義將雷殷符屯中牟破走之

後唐莊宗好畋獵獵於中牟踐民田中牟縣令當馬切諫爲民請莊宗怒叱縣令去將殺之伶人敬新磨知其不可乃率諸伶走追縣令擒至馬前責之曰汝爲縣令獨不知吾天子好獵耶奈何縱

民稼穡以供稅賦何不饑汝縣民而空此地以備吾天子之馳騁
汝罪當死因前請亟行刑諸伶共唱和之莊宗大笑縣令乃得免
縣東南三里有聖佛岡相傳昔有一遠方人偶步此岡渡石橋見
一大叢朴樹木幽翳殿閣輝煌寺僧留住一宿別歸邑中相識無
一存者問之已數世矣今大風起嘗吹出銅磁之器疑仙境也

何公祠在縣東二里寶蓮菴內公字柳溪唐時人師呂洞賓得上
昇曾與漢中牟令魯仲康同降乩聯句云天無聲臭自明明理自
中存道外呈夏日威嚴能育物春冰履蹈莫忘情本來面目堪終
古未去年華冀有成草木無知人共腐須知清夜有鐘聲又四言
云大造茫茫天心莫問經行磴磴志士守正理不可逃數不可論

壽仁天愚境亨境困升沈窮達命無所遁以上二章同治八年重修祠宇錄刊於石益以何公專詠七律一首云一從鞮鼓下漁陽蔓草荒榛最斷腸小謫紅塵隨燕雀常將白眼看滄桑六朝山在都成幻三月花開別有香莫笑邯鄲人未醒回頭何處不黃梁七絕一首云芒鞋踏破路重重飛過蓬萊第一峯世道從今誰指點數聲鐵笛笑春風又有乩墨楹聯長幅雕板懸之筆力健舉神采飛揚具有出塵之概

宋史李穀權判開封府時京畿多盜中牟尤甚穀誘邑人發其巢穴有劉德輿者梁時屢攝畿佐居中牟素有幹才穀卽署攝本邑主簿浹旬穀請侍衛兵數千佐德輿悉擒賊黨其魁一卽縣佐史

一御史臺吏搜其家得金玉財貨甚眾自是行者無患

宋史河渠志景德二年開封府言西京沿汴萬勝鎮先置斗門以減河水今汴河分注濁水入廣濟河堙塞不利帝曰此斗門本李繼源所造屢詢利害以爲始因京索河遇雨卽氾流入汴遂置斗門以便通洩若遽壅塞復慮決溢因令多用巨石高置斗門水雖甚大而餘波亦可減去

明萬曆四十二年縣南門內興國寺住持僧於院東掘地得小青錢數斗知縣王任臯親往視之令再掘深數尺見大石匣揭匣中又有小銀匣藏大舍利一顆又小者數顆復令掘傍有小鐵門扁之泉水湧出乃止任臯取大舍利去小者留寺中乃堅固子也及

任臯改任歸楚過湖風浪大作舟覆舍利沈任臯僅以身免

明崇禎九年正月十五日儒童張光燦夢一官府阜帽朱衣驪從前導云是中牟新城隍到任乃陝西白水人也黎明至廟拜謁道士訝其太早光燦語以故至十七日神前失劍道士禱於神越三日果有一人持劍徘徊廟前執送官自供攜劍赴省貸賣至中途忽昏眩本欲東去竟不知西行至此官治其罪於是邑人競傳城隍之靈異

張林宗民表負才磊落不偶作書擅顏魯公黃山谷之長天啓中以公車入都崔呈秀以吳綾求書公磨墨升許大書侍生張某人拜六字呈秀大怒幾陷不測然公名自此遠矣凡四方造公者禁

不作寒溫語狂談縱飲三日後始通名姓

王士禎香祖筆記曰中牟縣城南有湖數十畝中有亭額以蒲蘆
爲邑名士張林宗鴈跡之地予丙子以奉使祭告西嶽過之惜其
命名非典因爲易名墊巾以存林宗之舊使後來知名流故蹟

田文鏡督河南命魯之裕攝中牟李令卽攝中牟魯微行到境
父老數百再拜問訊曰聞有魯公來代吾令客在開封知否魯曰
若問云何曰吾令賢不忍其去也又數里見儒衣冠者簇簇然謀
曰好官去可惜俟魯公來蓋訴之魯心敬之至縣見李溫溫奇雅
非豪縱者問庫虧之故李曰某滇南萬里外人別毋遊京師十年
得中牟借俸迎毋毋至被劾命也言未畢泣魯竟別李之省田公

盛怒責之魯曰裕一寒士以求官故來河南得官中牟喜甚不意入境時李令之民心如是士心如是見其人知虧怒之故又如是公若以爲無可憐惜則裕再往取印未遲不然公轅外數十官皆求印不得者也裕何人敢逆公意耶田公默然良久曰微汝幾誤劾賢員但疏去矣奈何魯曰公有恩裕能追之請賜契箭爲信田公許之五日而疏還中牟令竟無恙 按袁枚小倉山房文集記此一事然舊志所載雍正年間知縣無姓李者不知枚何所據也錄以俟考

乾隆三年東十里鋪監生宋衍淇年七十疾終遇神語之曰汝一生多行陰騭不應卽死當增壽十年子孫且相繼顯達遂命一紅

衣者送之還果至八十而卒

忠節補遺

十年三月朔勵告成續報致命男婦六百三十五人除詳請奏卹外附綴於此所望後之作者以類次之

生員吳東林 生員吳東昇 張旺 段朝棟 邢萬祥 孫遂

孫來成 馬倉 馬老小 田光生 段小 段文林 雷元

邢黑 韓可貴 莊思溫 秦八斤

以上均係咸豐三年五月十七日粵匪竄境逼脅不從被害

張三 張麗城 張文治 張光才 張明友 張秋 張明德

張明士 張文山 朱會武 朱照明 張景兆 朱玉同

朱家玉 張清儒 朱照正 朱會春 張青山 朱潤身 張

牛 張維城 張文林 王冠 段金榜 段景全 段景義

段景元 段鐵 王大保 張文隆 王林山 張廷兆 馬石

頭 李萬田 蒿秉清 蒿永安 蒿永康 蒿秉乾 蒿邁丑

蒿長恩 蒿攀桂 蒿辰 馮雪林 馮紅 張留保 張連

城 張連學 孔昭和 馮創名 馮石礮 馮三 冉古城

冉秋 李錘 李天合 李天春 李鳴山 冉玉珍 冉玉光

馮克榮 馮柱 張其雨 張如松 張士誠 張文東 盧

景祥 盧天山 韓武元 韓武魁 梁陳有 朱福 石鐵

王改生 張森 張瑞圖 張山 袁守家 馬從學 馬克良

馬和尙 馮克仁 馮聚 趙兩圍 鄭增 鄭高 鄭克己

鄭克儉 趙二 馮紹宗 馮紹東 馮官祿 馮雙玉 馮

玉成 馮長順 馮長狂 馮峻嶺 閻秀松 閻海朝 閻體

康 閻保 閻文才 閻永倉 魏平 張學富 張學貴 李

振 李惠 郭顯有 郭成 王福有 楊春 黃立冠 黃小

冉雪 王瑞林 申雪 王連喜 張朱羣 李占魁 張長

嶺 蒿雲從 高國貴 高兩對 蒿永俊 張應魁 張春

張壺 張富 張有 張交 張廩 張長春 張丙戌 姜來

玉 姜改成 姜晏保 冉玉中 冉本全 冉長春 李文善

王春 王公旺 王七 王全有 馮秉述 馮水臨 王萬

疇 祝林宗 劉天士 張天秀 張天鳳 張正國 張四

張明德 張一發 張麥 張三 孔昭雲 樞近仁 桓虎

王馬 梁進財 梁元泰 梁順棲 梁金貞 梁大成 梁二

成 校成林 申玉成 冉本仁 冉本中 張太平 劉周林

劉三林 張殿邦 張大同 王秋 張劉保 張泰 張義

秦正德 秦正元 秦四 秦小丑 秦黑牛 秦狗 冉紀

禮 吳廷玉 吳秀書 吳廷秀 冉小小 冉二周 冉器

朱國才 趙清泰 冉循浩 趙歪 趙老牛 趙虎 馮鬪

賀雲鵬 賀應南 賀松林 徐天元 毛之屏 曹四倍 毛

保 毛二保 劉克儉 謝名樹 謝林 秦銀桂 李榮 李

保 吳恒 王合羣 王磨 王擾 耿成 耿明倫 陳平

梁德 王海 王虎 王喜 王叔和 王國祿 王二成 王

際會 王際有 王元 王大鴻 王二鴻 王叔東 董

楊金聲 楊金柱 王法 王建 張法 朱五 李小三

王博 張之厚 張治全 孫五 高天福 陳中 陳小海

劉三光 馬永光 宋合 鄧雪保 王黑 張馬 陳四倍

王振元

盧松妻師氏 胡闔氏 張文海妻袁氏 闔洪氏 王振標妻

王氏 張東山妻冉氏 盧剛妻師氏 張富妻馬氏 蒿秉忠

女明姑 鄒天保母某氏 鄒天保妻劉氏 張學富妻蘇氏

教場王謝周氏 楊和謝謝宋氏 草場王張氏 王蕭氏 冉

循道母楊氏 冉紀文母段氏 冉循有母楊氏 冉循有妻陳

氏

以上均係咸豐十年三月十九日皖捻竄境該男婦等或禦戰
力竭或被脅不從同日遇害

劉芝蘭 吳秀林 閻芳林 閻仲秋 朱富貴 李景堂 白

九思 劉玉堂 程世昌 郝金昌 孟明 蒲玉山 周義德

馬錫慶 毛虎林 程廷選 殷士忠 關一 鄭運清 許

長欽 傅全德 張啓龍 張朗 邱大阜 王成松 張成芳

丁驢 朱套 校景堂 牛良玉 楊開元 史師 楊義

朱七 柴山 巨四 王步青 張喜 張富 鄧狗 李貴

王小三 杜二 李興柱 郭安民 郭光朝 郭光德 郭光

法 梁師 張連 張蘭 張保 潘永安 田益平 劉祥 曾

保山 曾平 石馬 尙玉 陳冬 張柱 張喜成 張雪成

郭梁 郭二 郭三 郭如友 張金鼎 衡爽 李鐵梁

李才 李三 李玉柱 張小小 閻大漢 呂攤 劉詩 郭

成全 段六 李牛 王馬柱 高玉光 朱潤德 王景德

張永安 朱房 馬有江 陳有年 董山 王庭保 李惟一

王寅

武生

韓春元 常中規 毛生 王小小 慕狗 賈清

元

生員

高登雲 李大 許文明 王平 武占魁 張萬年

秦老小 王法有 王連升 王小小 婁中玉 婁中奇 馬

中倫 畢忠信 朱千石 路永城 吳二羣 路金山 宋傑

何順 朱槐 張三 周朱 周王傑 周大保 周全禮

閻根 段二黑 蔡大慶 孫搥 李西芳 鄭祥 鄭麥 鄭

羣 鄭小圭 蘇德 李清臣 吳歪子 陳書成 張振邦

張狗 張魁 張黑 王三

董萬有妻石氏 丁甲寅妻司氏 何馬駒妻王氏 周大漢妻

郭氏 董清波妻馬氏 劉雲路妻湯氏 朱勤妻張氏 孫柱

妻張氏 張甫太妻劉氏 王炎妻蔣氏 孫福德妻周氏 孫

聯芳妻朱氏 劉金女 劉炳妻楊氏

以上均係咸豐十一年八月初五六七及二十四五等日兩次
擒逆往來竄境該男婦等或戰或拒義不苟從先後被害

劉秉安 韓體源 劉辛 劉濟 張振 閻統緒 劉記 趙

申 韓占春 韓本源

以上均係同治元年九月十五日捻逆過境逼行不從被害

李印 張各具 單杲 張玉魁 呂景 呂長 梁光矩

珍 李廣三 趙鴻儀 李觀 李伯海 張三根 趙景堂

衡林

以上均係同治四年三月初九十一及二十日七月初一日捻
逆數至逼裹不從被害

李彤廷 李清有 朱重 朱迷 李小小 張蘇 張白 段

紹曾 張樂福 朱得桂 張景眉 張士珍 張仁壽 潘四

朱剛 朱四 彭丕基 朱大 朱保 朱八斤 李老牛

李信 周甲 伊振國 閻景盛 梁白 李成法 郭金梁

張縈 張文勤 劉中元 陳萬和 馬喜貴 馬拴 馬文

曹大 王玉蘭 王本立 王俊安 石萬玉 沈天長 王金

王 張位東 王瑞珍 王湊 賈德 賈成 高小小 王有

德 趙禮 張鳳來 袁保住 孫振來 李萬黨 杜中 馬

上林 李柱 張益 趙杰 王本忠 趙文中 王景雲 趙

喜川 郭萬林 王殿元 陳君錫 王國興 陳清元 王本

生 陳萬祥 趙有年 趙景海 孟秋 李金標 張天佑

張海晏 張景元 洪得貴 校長花 校振 王法祥 王法

全 王狗 王鳳智 王永祥 王生 席嘉 張調樓 梁九

斤 孫春貴 張六成 徐雪成 姚萬春 宋國禮 宋國治

周老牛 張臣 梁長富 宋老牛 蘇大冰 蘇二 闞子

學 閻樂天 惠維德 朱大成 趙金鐸 王和尚 李相林

耿延年 張義 張小狗 朱保成 婁鬪 邱秉心 劉中

雅 鄭詩 趙祿 張興 劉合法 趙三才 馮克揚 馮福

王德玉 馬國標 李明 冉本讓 張彭柱 王成 劉山

陸石頭 樓鼈 劉丙林 王元 張利海 谷萬昌 李遂

王勳 張成 宋治隆 胡紅岡 王修林 張六羣

毛莊蔣張氏 張立妻梁氏 蔣科妻王氏 王莊王王氏 趙

村趙王氏 趙張氏 趙楊氏 王楊氏 王劉氏 大莊朱朱

氏 鴈台寺村梁陳氏 小劉莊李李氏 大劉莊杜趙氏 王
鐵妻張氏 張老莊張劉氏 李全妻王氏 張鳳池妻呂氏
邱文純妻孫氏

以上均係同治五年二月十六日三月初六七八九及二十八
等日七月初二三日八月十五六日九月初十及十九日歷次
搶擾該男婦等不爲賊誘不爲賊污先後被害

中牟縣志卷之末

竊維邑之有志以備采風纂述固貴相因體例亦不容苟余此次修輯酌加變通以就成範然於舊志事實究無出入經年脫稿賴諸官紳分廉輸貲乃竟剗刷自應臚列銜名至於編訂采集之勞以今徵昔更不知昔年幾倍於今夫安可沒其姓氏耶爰分書之勲梓銜名

署中牟縣知縣吳若煊捐銀貳百兩

前任中牟縣知縣歐陽霖捐銀壹百兩

下南河同知陳桂芬捐銀伍拾兩

上南河同知陳丙昌捐銀伍拾兩

署中河通判薛福年捐銀貳拾兩

中牟上汛縣丞姚維立捐銀拾伍兩

中牟下汛縣丞汪紹洙捐銀拾兩

前任湖南按察使倉景恬捐銀陸拾兩

翰林院編修張鴻遠捐銀壹百兩

豫河營上南守備王忻捐銀叁拾兩

豫河營中河協備黃金城捐銀叁拾兩

中牟上汛分防李清家捐銀伍兩

中牟下汛把總錢九臯捐銀拾兩

前任下汛把總毛金貴捐銀拾兩

中牟下汛額外劉旺捐銀拾兩

同知職銜萬廷璘捐銀伍拾兩

同和泰鹽店捐銀拾兩

城內四街共捐錢

東西北三關共捐錢

東五里堡共捐錢貳拾千

十里堡共捐錢拾千

北鄭店共捐錢拾千

南鄭店共捐錢拾千

板橋共捐錢叁千

十五里堡共捐錢拾伍千

店李口共捐錢拾伍千

張村寺共捐錢貳拾千

韓莊共捐錢貳千

倉寨共捐錢捌千

西五里堡共捐錢伍千

十里鋪共捐錢拾千

十五里堡共捐錢拾千

三官廟共捐錢貳拾千

白沙共捐錢拾千

三十五堡共捐錢拾貳千伍百文

七吉寺共捐錢拾貳千

二十五里堡共捐錢玖千

謝莊共捐錢貳拾千

魯廟共捐錢貳拾千

魯村共捐錢拾伍千

二十里鋪共捐錢拾千

南梁共捐錢拾肆千伍百文

南永安共捐錢玖千

北永安共捐錢拾伍千

楊橋共捐錢拾千

南潘店共捐錢貳拾千

北潘店共捐錢貳拾千

阜澤共捐錢貳拾千

常店共捐錢貳拾千

南興隆共捐錢拾千

北興隆共捐錢拾千

七里岡共捐錢拾伍千

土山共捐錢貳拾千

黃店共捐錢貳拾千

鄭西共捐錢拾伍千

南報恩共捐錢拾伍千

北報恩共捐錢貳拾千

張莊共捐錢貳拾千

老營共捐錢拾伍千

官渡橋共捐錢拾玖千

水瀆共捐錢玖千

谷堆村共捐錢拾千

草場共捐錢貳拾千

西吳寺共捐錢貳拾千

灣張共捐錢拾千

賀岡共捐錢貳千

耿石共捐錢拾千

辛莊共捐錢拾伍千

杏樹鎮共捐錢拾千

聖水共捐錢拾千

東漳共捐錢貳拾千

朱姑共捐錢拾千